

ओं नमः परमात्मने, श्री महागणपतये नमः
श्री गुरुभ्यो नमः
हरिः ओं

कृष्ण यजुर्वेदीय तैत्तिरीय आरण्यकम्

प्रपाठकः 5 - 6

Table of Contents

5 कृष्ण यजुर्वेदीय तैत्तिरीय आरण्यके – पञ्चमः प्रपाठकः.....	7
5.1 पञ्चमः प्रपाठकः – शीक्षा वल्ली	7
अनुवाकं – 1.....	7
अनुवाकं – 2	7
अनुवाकं – 3	8
अनुवाकं – 4.....	9
अनुवाकं – 5	11
अनुवाकं – 6	12
अनुवाकं – 7	13
अनुवाकं – 8	13
अनुवाकं – 9	14
अनुवाकं – 10.....	14
अनुवाकं – 11.....	15
अनुवाकं – 12.....	16
ब्रह्मानन्द वल्ली.....	18
अनुवाकं – 13.....	18
अनुवाकं – 14	18
भृगु वल्ली.....	27
अनुवाकं – 15.....	27
6 कृष्ण यजुर्वेदीय तैत्तिरीय आरण्यके षष्ठः प्रपाठकः.....	36
6.1 षष्ठः प्रपाठकः – महानारायणोपनिषत्	36

अनुवाकं – 1.....	36
Special Korvai.....	49
Special Korvai.....	49
अनुवाकं – 2	50
अनुवाकं – 3	51
अनुवाकं – 4	51
अनुवाकं – 5	52
अनुवाकं – 6	52
अनुवाकं – 7	52
अनुवाकं – 8	53
अनुवाकं – 9	53
अनुवाकं – 10.....	53
अनुवाकं – 11.....	53
अनुवाकं – 12.....	54
अनुवाकं – 13.....	57
अनुवाकं – 14	59
अनुवाकं – 15.....	59
अनुवाकं – 16.....	60
अनुवाकं – 17.....	61
अनुवाकं – 18.....	61
अनुवाकं – 19.....	61
अनुवाकं – 20	62
अनुवाकं – 21.....	62
अनुवाकं – 22	62
अनुवाकं – 23	62

अनुवाकं – 24	63
अनुवाकं – 25	63
अनुवाकं – 26	63
अनुवाकं – 27	64
अनुवाकं – 28	65
अनुवाकं – 29	65
अनुवाकं – 30	65
अनुवाकं – 31.....	66
अनुवाकं – 32	66
अनुवाकं – 33	67
अनुवाकं – 34	67
अनुवाकं – 35	67
अनुवाकं – 36	68
अनुवाकं – 37	69
अनुवाकं – 38	69
अनुवाकं – 39	69
अनुवाकं – 40	70
अनुवाकं – 41	71
अनुवाकं – 42	71
अनुवाकं – 43	72
अनुवाकं – 44	72
अनुवाकं – 45	72
अनुवाकं – 46	73
अनुवाकं – 47	73
अनुवाकं – 48	73
अनुवाकं – 49	73

अनुवाकं – 50	74
अनुवाकं – 51.....	74
अनुवाकं – 52	74
अनुवाकं – 53	74
अनुवाकं – 54	75
अनुवाकं – 55	75
अनुवाकं – 56	75
अनुवाकं – 57	75
अनुवाकं – 58	76
अनुवाकं – 59	76
अनुवाकं – 60	77
अनुवाकं – 61.....	77
अनुवाकं – 62	77
अनुवाकं – 63	77
अनुवाकं – 64.....	78
अनुवाकं – 65	78
अनुवाकं – 66	79
अनुवाकं – 67	81
अनुवाकं – 68	82
अनुवाकं – 69	83
अनुवाकं – 70	84
अनुवाकं – 71.....	84
अनुवाकं – 72	85
अनुवाकं – 73	85
अनुवाकं – 74	85
अनुवाकं – 75	85

अनुवाकं – 76	86
अनुवाकं – 77	86
अनुवाकं – 78	86
अनुवाकं – 79	88
अनुवाकं – 80	92

Important Note:

There are two versions of Mahanarayana Upanishad (Prapaatkam 6) of Taittirya Aranyakam compiled from distinct sources (Schools/Sakha). We have **provided the longer version** of this as available in the book containing the **work of Shri Sayanacharya** as many of the members of the Group have been taught by their respective Gurus.

The Books containing the work of Shri Bhatta Bhaskaracharya Misra contains the shorter version. Contemporary book published by Shri Nrusimhachari Trust, Chennai also reflects this shorter version. The Scholar who compiled the work of Shri Sayanacharya has additionally given this shorter version also.

Veda learners are requested to get necessary clarifications from their Guru(s) before they use this Compilation.

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

5 कृष्ण यजुर्वेदीय तैत्तिरीय आरण्यके – पञ्चमः प्रपाठकः

5.1 पञ्चमः प्रपाठकः – शीक्षा वल्ली

अनुवाकं – 1

T.A.5.1.1

शन्नो॑ मि॒त्रः शं॑ व॒रुणः॑ । शन्नो॑ भव॒त्व॒र्य॒मा । शन्न॑ इन्द्रो॒ बृह॑स्पतिः ।

शन्नो॑ विष्णु॑-रु॒क्र॒मः । नमो॑ ब्रह्म॑णे । नम॑स्ते वा॒यो ।

त्वमे॒व प्र॒त्यक्षं॑ ब्रह्मा॑सि । त्वमे॒व प्र॒त्यक्षं॑ ब्रह्म॑ वदिष्यामि ।

ऋतं॑ वदिष्यामि । सत्यं॑ वदिष्यामि () । तन्मा॑मवतु । तद्व॒क्तार॑मवतु ।

अव॑तु मां । अव॑तु व॒क्तारं॑ ॥ ओं शान्तिः॑ शान्तिः॑ शान्तिः॑ । 1 (15)

(सत्यम् वदिष्यामि पञ्च च) (A1)

अनुवाकं – 2

T.A.5.2.1

शीक्षां॑ व्याख्यास्यामः । वर्णः॑ स्वरः । मात्रा॑ बलं । साम॑ सन्तानः ।

इत्युक्तः॑ शीक्षा॑ध्यायः । 2 (5) (शीक्षाम् पञ्च) (A2)

अनुवाकं – 3

T.A.5.3.1

सह नौ यशः । सह नौ ब्रह्मवर्चसं । अथातः स॒हिताया उपनिषदं
॥ व्याख्यास्यामः । पञ्चस्वधि-करणेषु । अधिलोकमधि-ज्यौतिष-
मधिविद्य-मधिप्रज-मध्यात्मं । ता महास॒हिता इत्याचक्षते ।
अथाधि लोकं । पृथिवी पूर्वरूपं । द्यौरुत्तररूपं ।

आकाशः सन्धिः । 3 (10)

T.A.5.3.2

वायुः सन्धानं । इत्यधि लोकं । अथाधि ज्यौतिषं । अग्निः पूर्वं
रूपं । आदित्य उत्तररूपं । आपः सन्धिः । वैद्युतः सन्धानं ।
इत्यधि ज्यौतिषं । अथाधि विद्यं । आचार्यः पूर्वं रूपं । 4 (10)

T.A.5.3.3

अन्तेवास्युत्तररूपं । विद्या सन्धिः । प्रवचनं सन्धानं । इत्यधि विद्यं ।
अथाधिप्रजं । माता पूर्वरूपं । पितोत्तररूपं । प्रजा सन्धिः ।
प्रजननं सन्धानं । इत्यधिप्रजं । 5 (10)

T.A.5.3.4

अथाध्यात्मं । अधराहनुः पूर्व रूपं । उत्तराहनु-रुत्तररूपं ।
वाक्-सन्धिः । जिह्वा सन्धानं । इत्यध्यात्मं । इती मामहा संहिताः ।
य एवमेता महासंहिता व्याख्याता वेद ।
सन्धीयते प्रजया पशुभिः । ब्रह्मवर्च-सेनान्नाद्येन
सुवर्ग्येण लोकेन () । 6 (10)

(सन्धि - राचार्यः पूर्वरूप - मित्यधिप्रजम् - लोकेन) (A3)

अनुवाकं - 4

T.A.5.4.1

यः छन्दसा-मृषभो विश्वरूपः । छन्दोभ्यो-ऽध्यमृताथ् संबभूव ।
स मेन्द्रो मेधया स्पृणोतु । अमृतस्य देव धारणो भूयासं ।
शरीरं मे विचर्षणं । जिह्वा मे मधुमत्तमा । कर्णाभ्यां भूरि विश्रुवं ।
ब्रह्मणः कोशोऽसि मेधया ऽपिहितः । श्रुतं मे गोपाय ।
आवहन्ती वितन्वाना । 7 (10)

T.A.5.4.2

कु॒र्वाणा ची॒र-मा॒त्मनः॑ । वा॒साँ॑सि म॒म गा॒वश्च॑ ।
 अ॒न्नपा॒ने च॑ स॒र्वदा॑ । ततो॑ मे श्रि॒य-मा॒वह॑ । लो॒मशां॑ प॒शुभिः॑ सह
 स्वाहा॑ । आ॒माय॑न्तु ब्र॒ह्मचा॒रिणः॑ स्वाहा॑ । वि॒माँ॑ऽऽय॑न्तु ब्र॒ह्मचा॒रिणः॑
 स्वाहा॑ । प्र॒माँ॑ऽऽय॑न्तु ब्र॒ह्मचा॒रिणः॑ स्वाहा॑ । द॒माय॑न्तु ब्र॒ह्मचा॒रिणः॑
 स्वाहा॑ । श॒माय॑न्तु ब्र॒ह्मचा॒रिणः॑ स्वाहा॑ । 8 (10)

T.A.5.4.3

य॒शो ज॒नेँ॑ऽऽनि स्वाहा॑ । श्रे॒यान् व॒स्यसोँ॑ऽऽनि स्वाहा॑ ।
 तं त्वा॑ भ॒ग प्र॒विशा॑नि स्वाहा॑ । स मा॑ भ॒ग प्र॒विश॑ स्वाहा॑ ।
 तस्मि॑न॒त् सह॑स्र शा॒खे । नि॒भगा॑हं त्वयि॑ मृ॒जे स्वाहा॑ ।
 यथाँ॑ऽऽपः प्र॒वताँ॑ऽऽय॑न्ति । यथा॑ मा॒सा अ॒हर्जरं॑ ।
 ए॒वं मां ब्र॒ह्मचा॒रिणः॑ । धा॒तरा॑य॒न्तु स॒र्वतः॑ स्वाहा॑ () ।
 प्र॒तिवे॑शोँ॑ऽसि प्र मा॑ भा॒हि प्र मा॑ प॒द्यस्व॑ । 9 (11)

(वि॒तन्वा॑ना - श॒माय॑न्तु ब्र॒ह्मचा॒रिणः॑ स्वाहा॑ - धा॒तरा॑य॒न्तु स॒र्वतः॑
 स्वा॒हैक॑म् च) (A4)

अनुवाकं – 5

T.A.5.5.1

भू-भुव-स्सुव-रिति वा एता स्तिस्रो व्याहृतयः ।
तासामुहस्मै तां चतुर्थीं । माहाचमस्यः प्रवेदयते ।
मह इति । तद् ब्रह्म । स आत्मा । अङ्गान्यन्या देवताः ।
भूरिति वा अयं लोकः । भुव इत्यन्तरिक्षं ।

सुव-रित्यसौ लोकः । 10 (10)

T.A.5.5.2

मह इत्यादित्यः । आदित्येन वाव सर्वे लोका महीयन्ते ।
भूरिति वा अग्निः । भुव इति वायुः । सुवरित्यादित्यः ।
मह इति चन्द्रमाः । चन्द्रमसा वाव सर्वाणि ज्योतीर्षि महीयन्ते ।
भू-रिति वा ऋचः । भुव इति सामानि ।

सुव रिति यजूर्षि । 11 (10)

T.A.5.5.3

मह इति ब्रह्म । ब्रह्मणा वाव सर्वे वेदा महीयन्ते । भूरिति वै प्राणः ।
भुव इत्यपानः । सुवरिति व्यानः । मह इत्यन्नं ।

अ॒न्ने॒न वा॒व स॒र्वे प्रा॒णा म॒ही॒यन्ते । ता वा ए॒ता-श्च॒तस्र॑ श्रु॒र्धा ।
च॒तस्र॑-श्च॒तस्रो॑ व्या॒हत॑यः । ता यो वे॒द () । स वे॒द ब्र॒ह्म ।
स॒र्वेऽस्मै॑ दे॒वा ब॒लि॒मा॒व॒हन्ति॑ । 12 (12)

(अ॒सौ लो॒को – यजू॑षि – वे॒द द्वे च॑) (A5)

अ॒नु॒वाकं॑ – 6

T.A.5.6.1

स य ए॒षोऽन्त॑र्-हृ॒दय॑ आ॒काशः॑ । तस्मि॑न्नयं पु॒रुषो॑ म॒नो॒मयः॑ ।
अ॒मृ॒तो हि॒र॒ण्म॒यः । अ॒न्त॒रेण॑ ता॒लु॒के । य ए॒ष स्त॑न इ॒वा॒व॒ल॒ंब॒ते ।
सै॒न्द्र यो॒निः । यत्रा॒सौ के॑शा॒न्तो वि॒वर्त्त॑ते । व्य॒पो॒ह्य शी॑र्ष॒क॒पा॒ले ।
भू॒रि॒त्य॒ग्नौ प्र॑ति॒तिष्ठ॑ति । भु॒व इति॑ वा॒यौ । 13 (10)

T.A.5.6.2

सु॒व॒रि॒त्यादि॑त्ये । म॒ह इति॑ ब्र॒ह्म॒णि । आ॒प्नो॑ति स्वा॒राज्यं॑ ।
आ॒प्नो॑ति म॒न॒स॒स्प॒तिं । वाक्प॑ति श्रु॒क्षु॒ष्य॒तिः । श्रो॑त्र॒पति॑ वि॒ज्ञान॑पतिः ।
ए॒तत् ततो॑ भ॒वति॑ । आ॒काश॑ शरी॒रं ब्र॒ह्म ।
स॒त्या॒त्म प्रा॑णा॒रामं॑ म॒न आ॑नन्दं । शा॒न्ति॑ स॒मृद्ध॑-म॒मृतं॑ () ।
इति॑ प्रा॒चीन॑ यो॒ग्योपा॑स्व । 14 (11) (वा॒या-व॒मृत॑ मे॒कम् च॑) (A6)

अनुवाकं - 7

T.A.5.7.1

पृ॒थिव्यन्तरि॑क्षं द्यौर्-दि॒शोऽव॑ान्तरदि॒शाः । अ॒ग्निर्-वा॒यु-रा॒दित्य॑-
श्चन्द्र॑मा नक्ष॒त्राणि॑ । आप॒ ओष॑धयो वनस्प॒तय॑ आका॒श आ॒त्मा ।
इत्य॑धिभू॒तं । अथा॑ध्या॒त्मं । प्रा॒णो व्या॒नोऽपान॑ उ॒दानः॑ स॒मानः॑ ।
चक्षुः॑ श्रो॒त्रं मनो॑ वाक् त्वक् । च॒र्म मा॒ञ् स॒स्नावा॑स्थि म॒ज्जा ।
एत॑ दधि॒विधा॒यर्षि॑र-वोचत् । पा॒ङ्क्तं॑ वा इ॒दञ् सर्वं॑ () ।
पा॒ङ्क्तं॑ नैव पा॒ङ्क्तञ् स्पृ॑णोतीति । 15 (11) (सर्वमेकम् च) (A7)

अनुवाकं - 8

T.A.5.8.1

ओ-मि॒ति ब्र॑ह्म । ओ-मि॒तीद॑ञ् सर्वं॑ ।
ओमि॒त्येत॑-दनु॒कृति॑ ह॒स्म वा अ॒प्यो श्रा॒वये॑त्या-श्रा॒वय॑न्ति ।
ओ-मि॒ति सा॒मानि॑ गा॒यन्ति॑ । ओञ् शोमि॒ति श॒स्त्राणि॑ शञ्सन्ति ।
ओ-मि॒त्यध्व॑र्युः प्र॒तिगरं॑ प्र॒तिगृ॑णाति । ओ-मि॒ति ब्र॑ह्मा प्र॒सौति॑ ।
ओ-मि॒त्यग्नि॑हो॒त्र-मनु॑जानाति । ओ-मि॒ति ब्रा॒ह्मणः॑ प्र॒वक्ष्य॑न्नाह
ब्र॒ह्मोपा॑प्नवानीति । ब्र॒ह्मैवो॑-पा॒प्नोति॑ । 16 (10) (ओम् दश) (A8)

अनुवाकं – 9

T.A.5.9.1

ऋ॒तं च॑ स्वा॒ध्याय॑ प्र॒वच॑ने च । स॒त्यं च॑ स्वा॒ध्याय॑ प्र॒वच॑ने च ।
तप॑श्च स्वा॒ध्याय॑ प्र॒वच॑ने च । दम॑श्च स्वा॒ध्याय॑ प्र॒वच॑ने च ।
शम॑श्च स्वा॒ध्याय॑ प्र॒वच॑ने च । अ॒ग्नय॑श्च स्वा॒ध्याय॑ प्र॒वच॑ने च ।
अ॒ग्नि॒हो॒त्रं च॑ स्वा॒ध्याय॑ प्र॒वच॑ने च । अ॒ति॒थय॑श्च स्वा॒ध्याय॑
प्र॒वच॑ने च । मा॒नुषं॑ च स्वा॒ध्याय॑ प्र॒वच॑ने च । प्र॒जा च॑ स्वा॒ध्याय॑
प्र॒वच॑ने च () । प्र॒जन॑श्च स्वा॒ध्याय॑ प्र॒वच॑ने च । प्र॒जा॒तिश्च॑ स्वा॒ध्याय॑
प्र॒वच॑ने च । स॒त्यमि॑ति स॒त्यव॑चा रा॒थी तरः॑ । तप॑ इति तपो॒नित्यः॑
पौ॒रु॒शि॒ष्टिः । स्वा॒ध्याय॑ प्र॒वच॑ने ए॒वेति॑ ना॒को मौ॑द्ग॒ल्यः ।
तद्धि॑ तप॒स्तद्धि॑ तपः । 17 (16)

(प्र॒जा च॑ स्वा॒ध्याय॑ प्र॒वच॑ने च षट्च॑) (A9)

अनुवाकं – 10

T.A.5.10.1

अ॒हं वृ॑क्षस्य रे॒रिवा॑ । की॒र्त्तिः पृ॑ष्ठं गि॒रेरि॑व ।
ऊ॒र्ध्व प॑वि॒त्रो वा॒जिनी॑व स्व॒मृत॑मस्मि । द्र॒वि॒णꣳ स॑वर्च॒सं ।

सुमेधा॑ अ॒मृतो॑क्षितः । इति॑ त्रिशङ्को॒र्-वेदा॑नुवचनं । 18 (6)

(अह॑ षट्) (A10)

अनुवाकं – 11

T.A.5.11.1

वेदम॑नूच्या- ऽचार्यो॑न्तेवासिन-म॑नुशास्ति ।

सत्यं॑ ँवद । धर्मं॑ चर । स्वाध्या॑यान्मा प्रमदः ।

आचार्या॑य प्रियं धनमा॑हत्य प्रजा॑तन्तुं मा व्यव॑च्छेत्सीः ।

सत्या॑न्न प्रमदित॒व्यं । धर्मा॑न्न प्रमदित॒व्यं । कुश॑लान्न प्रमदित॒व्यं ।

भूत्यै॑ न प्रमदित॒व्यं । स्वाध्या॑य प्रवचना॒भ्यां न प्रम॑दित॒व्यं । 19 (10)

T.A.5.11.2

देव॑पितृ॒कार्या॑भ्यां न प्रमदित॒व्यं । मातृ॑देवो भव । पितृ॑देवो भव ।

आचार्य॑ देवो भव । अति॑थिदेवो भव । यान्य॑नवद्यानि॒ कर्मा॑णि ।

तानि॑ सेवित॒व्यानि॑ । नो इ॑तराणि ।

यान्य॑स्माकं सुच॑रितानि ।

तानि॑ त्वयोपास्यानि । 20 (10)

T.A.5.11.3

नो इ॑तराणि । ये के॑ चास्म-च्छ्रेया॑ऽसो ब्राह्म॑णाः ।

तेषां त्वयाऽऽसने न प्रश्नसितव्यं । श्रद्धया देयं । अश्रद्धयाऽदेयं ।
श्रिया देयं । हिया देयं । भिया देयं । सँविदा देयं । अथ यदि ते
कर्मविचिकिथ्सा वा वृत्त विचिकिथ्सा वा स्यात् । 21 (10)

T.A.5.11.4

ये तत्र ब्राह्मणाः॥ सम्मर्शिनः । युक्ता आयुक्ताः । अलूक्षा धर्मकामाः
स्युः । यथा ते तत्र वर्त्तेरन् । तथा तत्र वर्त्तेथाः । अथाभ्याख्यातेषु ।
ये तत्र ब्राह्मणाः॥ सम्मर्शिनः । युक्ता आयुक्ताः ।

अलूक्षा धर्म कामाः स्युः । यथा ते तेषु वर्त्तेरन् () । 22 (10)

T.A.5.11.5

तथा तेषु वर्त्तेथाः । एष आदेशः । एष उपदेशः । एषा वेदोपनिषत् ।
एतदनुशासनं । एव मुपासितव्यं । एव मुचैतदुपास्यं । 23 (7)

(स्वाध्यायप्रवचनाभ्याम् न प्रमदितव्यम् – तानित्वयोपास्यानि –

स्यात् – तेषु वर्त्तेरन्थ् – +सप्त च) (A11)

अनुवाकं – 12

T.A.5.12.1

शन्नो मित्रः शं वरुणः । शन्नो भवत्वयमा । शन्न इन्द्रो बृहस्पतिः ।
शन्नो विष्णु रुरुक्रमः । नमो ब्रह्मणे । नमस्ते वायो ।

तैत्तिरीय आरण्यकं- शीक्षा वल्ली – (TA 5)

त्वमे॒व प्र॒त्यक्षं॑ ब्र॒ह्मा॑सि । त्वामे॒व प्र॒त्यक्षं॑ ब्र॒ह्मा॑ वादि॒षं । ऋ॒तम॑वादि॒षं ।

स॒त्यम॑वादि॒षं () । तन्मा॑मा॒वीत् । तद्व॑त्ता॒रमा॑वीत् । आ॒वीन्मां॑ ।

आ॒वी॒द्व॒त्ता॒रं॑ । ओं॑ शा॒न्तिः॑ शा॒न्तिः॑ शा॒न्तिः॑ । 24 (15)

(स॒त्यम॑वादि॒षम् पञ्च॑ च) (A12)

इति शीक्षावल्ली समाप्ता

ब्रह्मानन्द वल्ली

अनुवाकं – 13

T.A.5.13.1

सह॑ ना॒ ववतु॑ । सह॑ नौ॒ भुनक्तु॑ । सह॑ वी॒र्यं॑ करवावहै ।

तेज॑स्विना॒ वधी॑तमस्तु॒ मा विद्वि॑षावहै॑ ॥

ओं शान्तिः॑ शान्तिः॑ शान्तिः॑ । 25 (5) (सह॑ पञ्च॑) (A13)

अनुवाकं – 14

T.A.5.14.1

ब्रह्म॑विदा॒प्नोति॑ परं॑ ॥ तदे॒षाऽभ्यु॑क्ता । सत्यं॑ ज्ञान॒-मन॑न्तं ब्रह्म॑ ।

यो वेद॑ निहि॒तं गुहा॑यां परमे व्योमन् । सोऽश्नु॑ते सर्वा॒न् कामा॑न्थ्

सह॑ । ब्रह्म॑णा विपश्चि॒तेति॑ । तस्मा॑द्वा एतस्मा॑दात्मन॑ आकाशः॑

संभू॑तः । आका॑शाद् वायुः॑ । वायो॑रग्निः॑ । अग्ने॑रापः॑ । अद्भ्यः॑

पृथि॑वी । पृथि॒व्या ओष॑धयः॑ । ओष॑धीभ्योऽन्नं॑ ॥ अन्ना॑त् पुरुषः॑ ।

स वा एष॑ पुरुषोऽन्न॑रसमयः॑ । तस्ये॑दमेव शिरः॑ । अयं॑ दक्षिणः॑

पक्षः॑ । अयमु॑त्तरः॑ पक्षः॑ । अयमा॑त्मा । इदं॑ पुच्छं॑ प्रतिष्ठा ।

तदप्ये॑ष श्लो॒को भव॑ति । 26 (21)

T.A.5.14.2

अ॒न्ना॒द्वै प्र॒जाः प्र॒जाय॑न्ते । याः काश्च॑ पृ॒थि॒वीꣳ श्रि॒ताः ।
अथो॑ अ॒न्नेनै॒व जी॑वन्ति । अथै॑नदपि॒यन्त्यन्त॑तः ।
अ॒न्नꣳ हि भू॒तानां॑ ज्येष्ठं॑ ॥ तस्मा॑त् स॒र्वोष॑ध मु॒च्यते॑ ।
सर्वं॑ वै तेऽन्न॑माप्नुवन्ति । येऽन्नं॑ ब्र॒ह्मोपा॑सते । अ॒न्नꣳ हि भू॒तानां॑
ज्येष्ठं॑ ॥ तस्मा॑त् स॒र्वोष॑ध मु॒च्यते॑ । अ॒न्नाद् भू॒तानि॑ जायन्ते ।
जा॒ता॒न्यन्ने॑न वर्द्धन्ते । अद्य॑तेऽस्ति च॑ भू॒तानि॑ । तस्मा॑दन्नं॑ तदुच्य॑त
इति॑ । तस्मा॑द्वा एतस्मा॑-दन्न॑रसमयात् । अन्योऽन्तर॑ आ॒त्मा प्रा॑ण
मयः॑ । तेनै॑ष पू॒र्णः । स वा एष॑ पु॒रुष॑वि॒ध ए॒व । तस्य॑ पु॒रुष॑ वि॒धतां॑ ।
अन्व॑यं पु॒रुष॑ वि॒धः । तस्य॑ प्रा॑ण ए॒व शि॒रः । व्या॒नो दक्षि॑णः प॒क्षः ।
अपा॑न उत्त॑रः प॒क्षः । आका॑श आ॒त्मा । पृ॒थि॒वी पु॒च्छं प्रति॑ष्ठा ।
तद॑प्येष॑ श्लो॒को भ॑वति । 27 (26)

T.A.5.14.3

प्रा॒णं दे॒वा अनु॑प्राणन्ति । म॒नुष्याः॑ प॒शव॑श्च ये । प्रा॒णो हि भू॒ताना॑
मायुः॑ । तस्मा॑त् स॒र्वायु॑ष मु॒च्यते॑ । स॒र्वमे॒व त आ॑युर्यन्ति ।

ये प्रा॒णं ब्र॒ह्मो॒पास॑ते । प्रा॒णो हि भू॒ताना॑मायुः । तस्मा॑त् सर्वा॒युष-
मु॒च्यत॑ इति । तस्यै॑ष ए॒व शा॒रीर आ॒त्मा । यः पूर्॒वस्य॑ । तस्मा॑द्वा
एतस्मा॑त् प्रा॒णम॒यात् । अ॒न्योऽन्तर॑ आ॒त्मा म॒नोम॑यः । तेनै॑ष पूर्णः ।
स वा ए॑ष पु॒रुष॑वि॒ध ए॒व । तस्य॑ पु॒रुष॑वि॒धतां॑ । अ॒न्वयं॑ पु॒रुष॑वि॒धः ।
तस्य॑ यजु॒रे॒व शि॒रः । ऋ॒ग् दक्षि॑णः पक्षः । सा॒मोत्तरः॑ पक्षः ।
आ॒देश॑ आ॒त्मा । अथ॑र्वाङ्गि॒रसः पु॒च्छं प्रति॑ष्ठा ।
तद॒प्येष॑ श्लो॒को भ॒वति॑ । 28 (22)

T.A.5.14.4

यतो॑ वा॒चो नि॒वर्त्त॑न्ते । अ॒प्राप्य॑ म॒नसा॑ सह । आ॒नन्दं॑ ब्र॒ह्म॒णो वि॒द्वान् ।
न बि॒भेति॑ कदा॒चने॒ति । तस्यै॑ष ए॒व शा॒रीर आ॒त्मा । यः पूर्॒वस्य॑ ।
तस्मा॑द्वा एतस्मा॑न् म॒नोम॑यात् । अ॒न्योऽन्तर॑ आ॒त्मा वि॒ज्ञान॑मयः ।
तेनै॑ष पूर्णः । स वा ए॑ष पु॒रुष॑वि॒ध ए॒व । तस्य॑ पु॒रुष॑ वि॒धतां॑ ।
अ॒न्वयं॑ पु॒रुष॑ वि॒धः । तस्य॑ श्र॒द्धै॒व शि॒रः । ऋ॒तं दक्षि॑णः पक्षः ।
सत्य॑मु॒त्तरः॑ पक्षः । यो॒ग आ॒त्मा ।
महः॑ पु॒च्छं प्रति॑ष्ठा । तद॒प्येष॑ श्लो॒को भ॒वति॑ । 29 (18)

T.A.5.14.5

वि॒ज्ञानं॑ य॒ज्ञं त॑नुते । क॒र्माणि॑ त॒नुतेऽपि॑ च । वि॒ज्ञानं॑ दे॒वाः सर्वे॑ ॥
ब्र॒ह्म ज्येष्ठ॑-मुपा॒सते । वि॒ज्ञानं॑ ब्र॒ह्म चेद् वेद॑ । तस्मा॒च्चेन्न॑ प्र॒माद्य॑ति ।
शरी॑रे पाप्म॒नो हि॒त्वा । सर्वा॑न्-का॒मान्-सम॑श्नुत इति ।
तस्यै॑ष ए॒व शारी॑र आ॒त्मा । यः पूर्॑वस्य ।
तस्मा॒द्वा ए॒तस्माद्-वि॒ज्ञान॑मयात् । अ॒न्योऽन्तर॑ आ॒त्माऽऽन॑न्दमयः ।
तेनै॑ष पूर्णः । स वा ए॒ष पु॒रुष॑विध ए॒व । तस्य॑ पु॒रुष॑विधतां ।
अ॒न्वयं॑ पु॒रुष॑विधः । तस्य॑ प्रि॒य-मे॒व शि॒रः । मो॒दो दक्षि॑णः प॒क्षः ।
प्र॒मोद॑ उत्तरः प॒क्षः । आ॒नन्द॑ आ॒त्मा । ब्र॒ह्म पु॒च्छं प्र॑तिष्ठा ।
तद॒प्येष॑ श्लो॒को भ॑वति । 30 (22)

T.A.5.14.6

अस॒न्ने॒व स॑ भवति । अ॒सद् ब्र॒ह्मेति॑ वे॒द चेत् । अ॒स्ति ब्र॒ह्मेति॑ चेद्
वे॒द । स॒न्तमे॑नं ततो वि॒दुरि॑ति । तस्यै॑ष ए॒व शारी॑र आ॒त्मा ।
यः पूर्॑वस्य । अथातोऽनु प्र॒श्नाः । उ॒ता वि॒द्वा न॒मुं लो॒कं प्रे॑त्य ।
कश्च॑न ग॒च्छती॑(3) । आ॒हो वि॒द्वान॒मुं लो॒कं प्रे॑त्य ।

कश्चित् समश्नुता(3) उ । सोऽकामयत ।
 बहुस्यां प्रजायेयेति । स तपोऽतप्यत । स तपस्तप्त्वा ।
 इदं सर्व-मसृजत । यदिदं किञ्च । तत्सृष्ट्वा । तदेवानु प्राविशत् ।
 तदनुप्रविश्य । सच्च त्यच्चाभवत् । निरुक्तं चा निरुक्तं च ।
 निलयनं चा निलयनं च । विज्ञानं चा विज्ञानं च ।
 सत्यं चानृतं च सत्य-मभवत् । यदिदं किञ्च ।
 तत्सत्य-मित्या चक्षते । तदप्येष श्लोको भवति । 31 (28)

T.A.5.14.7

असद्वा इदमग्र आसीत् । ततो वै सदजायत । तदात्मानं
 स्वय-मकुरुत । तस्मात् तथ् सुकृतमुच्यत इति । यद्वै तथ् सुकृतं ।
 रसो वै सः । रसं ह्येवायं लब्ध्वाऽनन्दी भवति । को ह्येवान्यात्
 कः प्राण्यात् । यदेष आकाश आनन्दो न स्यात् । एष ह्येवानन्दयाति ।
 यदा ह्येवैष एतस्मिन्-नदृश्ये ऽनात्म्ये ऽनिरुक्ते ऽनिलयने ऽभयं
 प्रतिष्ठां विन्दते । अथ सोऽभयं गतो भवति । यदा ह्येवैष एतस्मिन्-
 नुदर-मन्तरं कुरुते । अथ तस्य भयं भवति । तत्त्वेव भयं विदुषो-

ॐ॒न्वान॑स्य । तद॒प्येष॑ श्लो॒को भ॑वति । 32 (16)

T.A.5.14.8

भी॒षाऽस्मा॑-द्वा॒तः प॑वते । भी॒षोदे॑ति॒ सूर्यः॑ ।

भी॒षाऽस्मा॑-दग्नि॑-श्चेन्द्र॑श्च । मृ॒त्युर् धा॑वति पञ्च॑म इति॑ ।

सै॒षाऽन॑न्दस्य मीमा॑न्सा भ॒वति॑ । यु॒वा स्या॑त् साधु॑ यु॒वाऽध्या॑यकः ।

आ॒शि॒ष्ठो दृ॒ढि॒ष्ठो ब॒लि॒ष्ठः । तस्ये॑यं पृथि॒वी सर्वा॑ वि॒त्तस्य॑ पूर्णा॒ स्यात् ।

स ए॒को मा॑नुष॒ आन॑न्दः । ते ये श॑तं मा॒नुषा॑ आ॒नन्दाः॑ । 33.a (10)

स ए॒को म॑नुष्य-गन्ध॒र्वाणा॑-मा॒नन्दः॑ । श्रो॒त्रिय॑स्य चा॒काम॑हतस्य ।

ते ये श॑तं म॑नुष्य-गन्ध॒र्वाणा॑-मा॒नन्दाः॑ । स ए॒को दे॒व-गन्ध॒र्वाणा॑-

मा॒नन्दः॑ । श्रो॒त्रिय॑स्य चा॒काम॑हतस्य । ते ये श॑तं दे॒व-गन्ध॒र्वाणा॑-

मा॒नन्दाः॑ । स ए॒कः पि॑तृणां चि॒रलोक॑-लो॒काना॑-मा॒नन्दः॑ ।

श्रो॒त्रिय॑स्य चा॒काम॑हतस्य ।

ते ये श॑तं पि॑तृणां चि॒रलोक॑-लो॒काना॑-मा॒नन्दाः॑ ।

स ए॒क आ॑जान॒जानां॑ दे॒वाना॑-मा॒नन्दः॑ । 33.b (10)

श्रोत्रियस्य चाकामहतस्य । ते ये शत-माजान-जानां देवाना
मानन्दाः । स एकः कर्म-देवानां देवाना-मानन्दः ।
ये कर्मणा देवानपि यन्ति । श्रोत्रियस्य चाकामहतस्य ।
ते ये शतं कर्मदेवानां देवाना-मानन्दाः । स एको देवाना-मानन्दः ।
श्रोत्रियस्य चाकामहतस्य । ते ये शतं देवाना-मानन्दाः ।
स एक इन्द्रस्यानन्दः । 33.c (10)

श्रोत्रियस्य चाकामहतस्य । ते ये शतमिन्द्र-स्याऽऽनन्दाः ।
स एको बृहस्पते-रानन्दः । श्रोत्रियस्य चाकामहतस्य ।
ते ये शतं बृहस्पते रानन्दाः । स एकः प्रजापते-रानन्दः ।
श्रोत्रियस्य चाकामहतस्य । ते ये शतं प्रजापते-रानन्दाः ।
स एको ब्रह्मण आनन्दः । श्रोत्रियस्य चाकामहतस्य । 33.d (10)

स यश्चायं पुरुषे । यश्चासा-वादित्ये । स एकः । स य एवं ॐ वित् ।
अस्माल्लोकात् प्रेत्य । एतमन्नमय-मात्मान-मुपसङ्क्रामति ।
एतं प्राणमय-मात्मान-मुपसङ्क्रामति ।

ए॒तं॑ म॒नो॒म॒य-मा॒त्मान-मु॒प॒स॒ङ्क्रा॒म॒ति ।

ए॒तं॑ वि॒ज्ञा॒न॒म॒य-मा॒त्मान-मु॒प॒स॒ङ्क्रा॒म॒ति ।

ए॒त॒मा॒न॒न्द॒म॒य-मा॒त्मान-मु॒प॒स॒ङ्क्रा॒म॒ति ।

तद॒प्येष॑ इ॒लो॒को भ॒व॒ति । 33.e (11)

T.A.5.14.9

य॒तो वा॒चो॒ नि॒व॒र्त्त॒न्ते । अ॒प्रा॒प्य॑ म॒न॒सा॒ स॒ह । आ॒न॒न्दं॑ ब्र॒ह्म॒णो वि॒द्वान् ।

न बि॒भे॒ति कु॒तश्च॑ने॒ति । ए॒त॒ ह वा॒ व न॑ त॒प॒ति ।

कि॒म॒ह॒ सा॒धु ना॒कर॒वं । कि॒म॒हं पा॒प-म॒कर॒व-मि॒ति ।

स य॑ ए॒वं वि॒द्वाने॒ते आ॒त्मा॒न॒ स्पृ॒णु॒ते । उ॒भे ह्ये॒वैष॑ ए॒ते आ॒त्मा॒न॒ स्पृ॒णु॒ते ।

य ए॒वं वे॒द । इ॒त्यु॒प॒नि॒षत् । 34 (11)

स॒ह ना॑ व॒वतु॑ । स॒ह नौ॑ भु॒नक्तु॑ । स॒ह वी॒र्यं॑ क॒रवा॒वहै॑ ।

ते॒ज॒स्वि॒ना व॒धी॒त॒म॒स्तु॒ मा वि॒द्विषा॑वहै॑ । ओं॑ शान्तिः॑ शान्तिः॑ शान्तिः॑ ।

(ब्रह्मविदिदमयमिदमेकविंशतिः । अत्रा दत्तरसमयात् प्राणो
व्यानोऽपान आकाशः पृथिवि पुच्छं षड्विंशतिः ।
प्राणम् प्राणमयान् मनो यजुर् ऋक् सामादेशोऽथर्वाङ्गिरसः पुच्छम्
द्वाविंशतिः । यतः श्रद्धर्त्तं सत्यम् यौगो महोऽष्टादश । विज्ञानम्
प्रियम् मोदः प्रमोद आनन्दो ब्रह्म पुच्छम् द्वाविंशतिः ।
असन्नेवाथाष्टाविंशतिः । असत् षोडश । भीषाऽस्मान् मानुषो
मनुष्यगन्धर्वाणाम् देवगन्धर्वाणाम् पितृणाम्चिरलोकलोकाना
माजानजानाम् कर्मदेवानाम् ये कर्मणा देवानामिन्द्रस्य बृहस्पतेः
प्रजापतेर् ब्रह्मणः स यश्च संक्रामत्येकपञ्चाशत् ।
यतः कुतश्च नैतमेकादश नव) (A14)

इति ब्रह्मानन्दवल्ली समाप्ता

=====

भृगु वल्ली

सह॑ ना॒ ववतु॑ । सह॑ नौ॒ भुनक्तु॑ । सह॑ वी॒र्यं॑ करवावहै ।

तेज॑स्विना॒ वधी॑तमस्तु॒ मा वि॑द्विषावहै॑ ।

ओं शान्तिः॑ शान्तिः॑ शान्तिः॑ ।

अनुवाकं - 15

T.A.5.15.1

भृगु॑र्वै वा॒रुणिः॑ । वरु॑णं पि॒तर-मु॑पससार । अधी॑हि भगवो ब्रह्मेति॑ ।

तस्मा॑ एतत् प्रो॒वाच॑ । अन्नं॑ प्रा॒णं चक्षुः॑ श्रोत्रं॑ मनो॑ वाचमिति॑ ।

त॒प् हो॒वाच॑ । यतो॑ वा इ॒मानि॑ भू॒तानि॑ जायन्ते । येन॑ जा॒तानि॑

जीव॑न्ति । यत् प्र॒यन्त्य॑भि॒ सम्वि॑शन्ति । तद् विजि॑ज्ञासस्व ।

तद् ब्रह्मेति॑ । स तपो॑ऽतप्यत । स तप-॑स्तप्त्वा । 35 (13)

T.A.5.15.2

अन्नं॑ ब्रह्मेति॑ व्यजानात् । अन्ना॑द्ध्ये॒व खल्वि॑मानि॒ भूतानि॑ जायन्ते ।

अन्नेन॑ जा॒तानि॑ जीवन्ति । अन्नं॑ प्र॒यन्त्य॑भि-सम्वि॑शन्तीति॑ ।

तद् वि॒ज्ञाय॑ । पुनरे॒व वरु॑णं पि॒तर-मु॑पससार ।

अधी॑हि भगवो ब्रह्मेति॑ । त॒प् हो॒वाच॑ । तप॑सा ब्रह्म॒ विजि॑ज्ञासस्व ।

तपो ब्रह्मेति । स तपोऽतप्यत । स तप-स्तप्त्वा । 36 (12)

T.A.5.15.3

प्राणो ब्रह्मेति व्यजानात् । प्राणाद्ध्येव खल्विमानि भूतानि
जायन्ते । प्राणेन जातानि जीवन्ति । प्राणं प्रयन्त्यभि-सम्विशन्तीति ।
तद् विज्ञाय । पुनरेव वरुणं पितर-मुपससार । अधीहि भगवो
ब्रह्मेति । त॒ होवाच । तपसा ब्रह्म विजिज्ञासस्व । तपो ब्रह्मेति ।
स तपोऽतप्यत । स तप-स्तप्त्वा । 37 (12)

T.A.5.15.4

मनो ब्रह्मेति व्यजानात् । मनसो ह्येव खल्विमानि भूतानि जायन्ते ।
मनसा जातानि जीवन्ति । मनः प्रयन्त्यभि-सम्विशन्तीति ।
तद् विज्ञाय । पुनरेव वरुणं पितर-मुपससार । अधीहि भगवो
ब्रह्मेति । त॒ होवाच । तपसा ब्रह्म विजिज्ञासस्व । तपो ब्रह्मेति ।
स तपोऽतप्यत । स तप-स्तप्त्वा । 38 (12)

T.A.5.15.5

विज्ञानं ब्रह्मेति व्यजानात् । विज्ञाना-द्ध्येव खल्विमानि भूतानि
जायन्ते । विज्ञानेन जातानि जीवन्ति । विज्ञानं प्रयन्त्यभि-

सम्॑वि॒शन्तीति॑ । तद् वि॒ज्ञाय॑ । पुन॑रेव वरुणं॑ पि॒तर-मु॑पससार ।
अधी॑हि भगवो ब्रह्मेति॑ । त॒प् हो॑वाच । तप॑सा ब्रह्म विजि॑ज्ञासस्व ।
तपो॑ ब्रह्मेति॑ । स तपो॑ऽतप्यत । स तप॑-स्तप्त्वा । 39 (12)

T.A.5.15.6

आन॑न्दो ब्रह्मेति॑ व्य॒जाना॑त् । आन॑न्दा-द्ध्ये॒व-ख॑ल्वि॒मानि॑ भू॒तानि॑
जा॒यन्ते॑ । आन॑न्देन जा॒तानि॑ जी॒वन्ति॑ । आन॑न्दं प्र॒यन्त्यभि॑-
सम्॑वि॒शन्तीति॑ । सैषा भा॑र्गवी वा॒रुणी॑ वि॒द्या । पर॑मे व्यो॒मन्
प्रति॑ष्ठिता । य ए॒वं वे॒द प्र॑ति॒तिष्ठ॑ति । अन्न॑वा॒नन्ना॑दो भ॒वति॑ ।
म॒हान् भ॑वति प्र॒जया॑ प॒शुभिर् ब्र॑ह्मवर्च॒सेन॑ । म॒हान् की॒र्त्या । 40 (10)

T.A.5.15.7

अन्नं॑ न नि॒न्द्यात् । तद् व्र॑तं । प्रा॒णो वा अन्नं॑ । शरी॑रमन्नादं ।
प्रा॒णो शरी॑रं प्रति॒ष्ठितं॑ । शरी॑रे प्रा॒णः प्रति॑ष्ठितः । तदे॒त-दन्न॑-म॒न्ने
प्रति॑ष्ठितं । स य ए॒त-दन्न॑-म॒न्ने प्रति॑ष्ठितं वे॒द प्र॑ति॒तिष्ठ॑ति ।
अन्न॑वा॒नन्ना॑दो भ॒वति॑ । म॒हान् भ॑वति प्र॒जया॑ प॒शुभिर्-
ब्र॑ह्मवर्च॒सेन॑ । म॒हान् की॒र्त्या । 41 (11)

T.A.5.15.8

अ॒न्नं न॒ परि॑चक्षी॒त । तद् व्र॑तं । आ॒पो वा अ॒न्नं । ज्यो॑ति॒रन्ना॑दं ।
अ॒प्सु ज्यो॑तिः॒ प्रति॑ष्ठितं । ज्यो॑ति॒ष्यापः॒ प्रति॑ष्ठिताः ।
तदे॒त-द॒न्न-म॒न्ने प्रति॑ष्ठितं । स य ए॒त-द॒न्न-म॒न्ने प्रति॑ष्ठितं ँ॒वेद
प्रति॑तिष्ठति । अ॒न्नवा॑-न॒न्नादो॑ भवति । म॒हान् भव॑ति प्र॒जया॑ प॒शुभिर्
ब्र॒ह्मव॑र्च॒सेन॑ । म॒हान् की॒र्त्या । 42 (11)

T.A.5.15.9

अ॒न्नं बहु॑ कुर्वी॒त । तद् व्र॑तं । पृ॒थि॒वी वा अ॒न्नं । आ॒काशो॑ऽन्ना॑दः ।
पृ॒थि॒व्या-मा॑का॒शः प्रति॑ष्ठितः । आ॒काशे॑ पृ॒थि॒वी प्रति॑ष्ठिता ।
तदे॒त-द॒न्न-म॒न्ने प्रति॑ष्ठितं । स य ए॒त-द॒न्न-म॒न्ने प्रति॑ष्ठितं ँ॒वेद
प्रति॑तिष्ठति । अ॒न्नवा॑न॒न्नादो॑ भवति । म॒हान् भव॑ति प्र॒जया॑ प॒शुभिर्
ब्र॒ह्मव॑र्च॒सेन॑ । म॒हान् की॒र्त्या । 43 (11)

T.A.5.15.10

न कञ्च॑न वस॒तौ प्र॑त्याचक्षी॒त । तद् व्र॑तं ।
तस्मा॑द्यया कया च वि॒धया॑ ब॒ह्वन्नं॑ प्राप्नुयात् ।
अ॒राध्य॑स्मा अ॒न्नमि॑त्याचक्षते । ए॒तद्वै मु॒खतो॑ऽन्न॒ꣳ रा॒द्धं ।

मुखतोऽस्मा अन्नञ् राध्यते । एतद्वै मध्यतोऽन्नञ् राद्धं ।

मध्यतोऽस्मा अन्नञ् राध्यते । एदद्वा अन्ततोऽन्नञ् राद्धं ।

अन्ततोऽस्मा अन्नञ् राध्यते । 44.a (10)

य एवं वेद । क्षेम इति वाचि । योगक्षेम इति प्राणापानयोः ।

कर्मेति हस्तयोः । गति-रिति पादयोः । विमुक्ति-रिति पायौ ।

इति मानुषीः समाज्ञाः । अथ दैवीः । तृप्ति-रिति वृष्टौ ।

बल-मिति विद्युति । 44.b (10)

यश इति पशुषु । ज्योतिरिति नक्षत्रेषु । प्रजाति-रमृत-

मानन्द इत्युपस्थे । सर्व मित्याकाशे । तत् प्रतिष्ठे-त्युपासीत ।

प्रतिष्ठावान् भवति । तन्मह इत्युपासीत । महान् भवति ।

तन्मन इत्युपासीत । मानवान् भवति । 44.c (10)

तन्नम इत्युपासीत । नम्यन्तेऽस्मै कामाः । तद्ब्रह्मे-त्युपासीत ।

ब्रह्मवान् भवति । तद् ब्रह्मणः परिमर इत्युपासीत ।

पर्ये॑णं॒ म्रिय॑न्ते॒ द्विष॑न्तः सप॒त्नाः । परि॑ येऽप्रि॒या भ्रातृ॑व्याः ।

स यश्चा॑यं पु॒रुषे॑ । यश्चा॑सा-वादि॒त्ये । स एकः॑ । 44.d (10)

स य॑ एवं॒ वित् । अस्मा॑ल्-लो॒कात् प्रे॒त्य । एत॑मन्नमय-मा॒त्मान-
मुप॑सङ्क्र॒म्य । एतं॑ प्राणमय-मा॒त्मान-मुप॑सङ्क्र॒म्य ।

एतं॑ मनोमय-मा॒त्मान-मुप॑सङ्क्र॒म्य । एतं॑ वि॒ज्ञान॑मय-मा॒त्मान-
मुप॑सङ्क्र॒म्य । एत॑ मानन्दमय मा॒त्मान मुप॑सङ्क्र॒म्य ।

इमा॑न् लो॒कान् कामा॑न्नी काम-रूप्य॑नुसञ्च॒रन् ।

एत॑थ् साम॑ गाय॒न्नास्ते॑ । हा(३) वु हा(३) वु हा(३) वु । 44.e (10)

अह॑-मन्न॒-मह॑-मन्न॒-मह॑मन्नं । अह॑मन्नादो(२)ऽह॑मन्नादो(२)

ऽह॑मन्नादः । अह॑ ऽ॒श्लोक॑कृ-दह॑ ऽ॒श्लोक॑कृ-दह॑ ऽ॒श्लोक॑कृत् ।

अह॑मस्मि प्रथम॑जा ऋ॒ता(३) स्य॑ । पूर्वं॑ दे॒वेभ्यो॑ अमृत॑स्य ना(३)

भा॒ इ । यो मा॑ ददाति स इदे॒व मा(३)वाः॑ । अह॑-मन्न॒-मन्न॒-मद॑न्त-

मा(३)॒न्नि । अहं॑ वि॒श्वं भुव॑न-मभ्य॑भवां । सुव॑र्न ज्योतीः॑ ।

य एवं॑ वे॒द । इत्यु॑पनिषत् । 44.f (11)

सह ना॑ ववतु । सह नौ॑ भुनक्तु । सह वीर्यं॑ करवावहै ।
तेज॑स्विना वधी॑तमस्तु मा विद्विषा॑वहै । ओं शान्तिः॑ शान्तिः॑ शान्तिः॑ ।
(भृगु॑स्त्रयो॑दशा - त्र॑म् - प्रा॒णो - मनो॑ - वि॒ज्ञान॑म् द्वाद॑श
द्वाद॑शा - नन्दो॑ दशा - त्र॑म् न नि॒न्धा - दन्न॑म् न परि॑चक्षीता -
त्र॑म् बहु॒कुर्वि॑ तैका॑दशैका॑दश - न कंच॑ नैक॑षष्टिर्दश॑) (A15)
इति भृगुवल्ली समाप्ता

Prapaataka Korvai with starting Padams of 1 to 15 Anuvaakams :-

(श॑म् नः - शी॒क्षा - सह॑ नौ - यः छन्द॑साम् - भूः -
स यः - पृ॑थि - व्यो॒मि - तृ॒तम् चा - ह॑म् - वै॒दम॑नुच्य -
श॑म् नः - सह॑ नाववतु - ब्र॒ह्मवि॑द् - भृ॒गुः पञ्च॑दश)

Korvai with starting Padams of 1, 11, 21 Series of Dasinis :-

(श॑म् नो - मह॑ इत्या॒दित्यो - नो॑ इ॒तरा॑ण्य - स॒न्नेवा -
त्र॑म् न नि॒न्धाच्च॑तुश्च॒त्वारि॑ंशत्)

First and Last Padam in TA, 5th Prapaatakam :-

(शत्रु - इत्युपनिषद्)

। हरिः ओम् ।

। कृष्ण यजुर्वेदीय तैत्तिरीय ब्राह्मणे आरण्यके पञ्चमः प्रपाठकः समाप्तः ।

=====

Details of Dasini&Vaakyams for – Prapaatakam5 – TA 5

	Dasini	Vaakyams
Anuvakam 1	1	15
Anuvakam 2	1	5
Anuvakam 3	4	40
Anuvakam 4	3	31
Anuvakam5	3	32
Anuvakam6	2	21
Anuvakam7	1	11
Anuvakam8	1	10
Anuvakam9	1	16
Anuvakam 10	1	6
Anuvakam 11	5	47
Anuvakam 12	1	15
Anuvakam 13	1	5
Anuvakam 14	9	215

तैत्तिरीय आरण्यकं – भृगु वल्ली – TA- 5

Anuvakam 15	10	165
Total →	44	634

<u>Total as per</u> <u>grantha books</u> anuvaakam 15	44	
---	----	--

6 कृष्ण यजुर्वेदीय तैत्तिरीय आरण्यके षष्ठः प्रपाठकः

6.1 षष्ठः प्रपाठकः – महानारायणोपनिषत्

सह॑ ना॒ ववतु॑ । सह॑ नौ॒ भुनक्तु॑ । सह॑ वी॒र्यं॑ करवावहै ।

तेज॑स्विना॒ वधी॑तमस्तु॒ मा वि॑द्विषावहै॑ ॥

ओं शान्तिः॑ शान्तिः॑ शान्तिः॑ ।

अनुवाकं – 1

T.A.6.1.1

अ॒भस्य॑ पा॒रे भुव॑नस्य॒ मध्ये॑ ना॒कस्य॑ पृ॒ष्ठे म॑हतो म॒हीयान्॑ ।

शु॒क्रेण॑ ज्योती॒ष्णि स॑मनुप्रविष्टः॒ प्रजा॑पतिश्चरति॒ गर्भे॑ अ॒न्तः ।

यस्मि॑न्निदं॒ सञ्च॑ विचैति॒ सर्वं॑ यस्मि॑न् दे॒वा अधि॑ विश्वे॒ निषे॑दुः ।

तदे॒व भू॒तं तदु॑ भव्यमा॒ इदं॑ तदक्षरे॒ पर॑मे व्योमन् ।

येना॑ वृ॒तं खञ्च॑ दि॒वं म॒हीञ्च॑ येना॒दित्य॑-स्तपति॒ तेज॑सा

भ्राज॑सा च । यम॑न्तः स॒मुद्रे॑ क॒वयो॑ वय॑न्ति यदक्षरे॒

पर॑मे प्रजाः । यतः॑ प्रसू॒ता जग॑तः प्रसू॒ती तो॑येन जी॒वान् व्यच॑सर्ज
भू॒म्यां॑ ॥ यदोष॑धीभिः पु॒रुषान्॑ प॒शूञ्च॑ वि॒वेश॑ भू॒तानि॑ चराचराणि ।

अतः॑ परं॑ नान्य॑-दणी॑यस॒ ७ हि॑ परा॒त् परं॑ यन् मह॑तो महान्तं॑ ।
यदे॑क-मव्य॑क्त-मन॑न्तरूपं॑ विश्वं॑ पुरा॑णां तम॑सः पर॑स्तात् । 1 (10)

T.A.6.1.2

तदे॑वर्त्तं तदु॑ सत्य॑माहु॒-स्तदे॑व ब्रह्म॑ पर॑मं क॒वीनां॑ ।
इ॒ष्टापूर्त्तं॑ बहु॒धा जा॑तं जा॒यमानं॑ विश्वं॑ बि॒भर्त्ति॑ भुव॑नस्य॒ नाभिः॑ ।
तदे॑वाग्नि॒-स्तद्वा॒यु-स्तथ्सू॑र्यस्तदु॑ चन्द्र॑माः ।
तदे॑व शु॒क्रम॒मृतं॑ तद्ब्रह्म॑ तदापः॑ स प्र॒जाप॑तिः ।
सर्वे॑ नि॒मेषा॑ ज॒ज्ञिरे॑ विद्यु॒तः पुरु॑षादधि ।
क॒ला मु॒हूर्त्ताः का॒ष्ठाश्चा॒हो-रा॒त्राश्च॑ सर्व॑शः ।
अ॒र्धमा॒सा मा॒सा ऋ॒तवः॑ सँव॑त्सरश्च॒ कल्प॑न्तां ।
स आपः॑ प्रदु॒घे उ॒भे इ॒मे अ॒न्तरि॑क्ष-मथो॒ सुवः॑ ।
नैन॑-मू॒र्ध्वं न ति॑र्यं च न म॒ध्ये परि॑जग्र॒भत् ।
न तस्ये॑शो कश्च॑न तस्य॑ नाम मह॑द्यशः । 2 (10)

T.A.6.1.3

न संदृ॑शे तिष्ठ॑ति रूप॑मस्य॒ न चक्षु॑षा पश्य॑ति कश्चनैनं॑ ।
हृदा॑ मनी॑षा मन॑साऽभि क्लृ॑प्तो य ए॑नं वि॒दु-र॑मृतास्ते भव॑न्ति ।

Expansion of अद्भ्यः संभूतः : (Appearing in T.A.3.13.1)

अद्भ्यः॑ संभू॑तः पृथि॑व्यै रसाच्च॑ । विश्व॑कर्मणः॒ सम॑वर्तताधि॑ ।
तस्य॑ त्वष्टा॑ विद॑धद्रूपमे॑ति । तत्पु॑रुषस्य॒ विश्व॑माजा॒नम॑ग्रे ।
वेदा॑हमेतं॒ पुरु॑षं म॒हान्तं॑ । आदि॑त्य वर्णं॒ तम॑सः पर॑स्तात् ।
तमे॑वं वि॒द्वान॑मृत॒ इह॑ भव॑ति । नान्यः॑ पन्था॒ विद्य॑तेऽय॒नाय॑ ।
प्रजा॑पतिश्चर॑ति गर्भे॑ अन्तः॑ । अजा॑यमानो बहु॒धा विजा॑यते ।
तस्य॑ धीराः॒ परि॑जानन्ति॒ योनिं॑ । मरी॑चीनां पदमिच्छ॑न्ति
वेध॑सः । यो दे॒वेभ्य॑ आत॑पति । यो दे॒वानां॑ पु॒रोहि॑तः ।
पूर्वो॑ यो दे॒वेभ्यो॑ जातः॑ । नमो॑ रुचा॒य ब्रा॑ह्म॒ये । रुचं॑ ब्राह्मं
जन॑यन्तः । दे॒वा अ॒ग्रे तद॑ब्रुवन् । यस्त्वै॑वं ब्रा॒ह्मणो॑ विद्यात् ।
तस्य॑ दे॒वा अ॒सन् व॑शे । ह्रीश्च॑ते लक्ष्मीश्च॒ पत्न्यौ॑ ।
अ॒होरा॑त्रे पा॒र्श्वे । नक्ष॑त्राणि रूपं॑ । अ॒श्विनौ॑ व्या॒त्तं ।
इष्टं॑ म॒निषा॑ण । अ॒मुं म॒निषा॑ण । सर्वं॑ म॒निषा॑ण ।

Expansion of हिरण्यगर्भः : (Appearing in T.S.4.1.8.3)

हिरण्यगर्भः॑ समवर्त्तताग्रे॑ भू॒तस्य॑ जा॒तः पति॑रेक॒ आसीत् ।
स दा॒धार पृथि॑वीं द्यामु॒तेमां॑ कस्मै॒ देवाय॑ ह॒विषा॑ वि॒धेम ।

यः प्रा॑णतो नि॒मिषतो॑ म॒हित्वैक॑ इ॒द्राजा॑ जग॒तो बभू॑व ।
य ई॒शे अस्य॑ द्वि॒पद-॑श्चतु॒ष्पदः॑ कस्मै॒ देवाय॑ ह॒विषा॑ वि॒धेम ।

य आ॑त्मदा॒ बलदा॑ यस्य॒ विश्व॑ उपा॒सते॑ प्र॒शिषं॑ ँयस्य॒ देवाः ।
यस्य॑ छा॒यामृतं॑ ँयस्य॒ मृत्युः॑ कस्मै॒ देवाय॑ ह॒विषा॑ वि॒धेम ।

यस्ये॑मे हि॒मवन्तो॑ म॒हित्वा॑ यस्य॒ समु॒द्रं रस॑या॒ सहाऽऽहुः॑ ।
यस्ये॑माः प्र॒दिशो॑ यस्य॒ बाहू॑ कस्मै॒ देवाय॑ ह॒विषा॑ वि॒धेम ।

यं क्र॑न्दसी॒ अवसा॑ तस्त॒भाने॑ अ॒भ्यैक्षे॑तां॒ मनसा॑ रेज॒माने॑ ।

यत्रा॑धिसू॒र उदि॑तौ व्येति॒ कस्मै॒ देवाय॑ ह॒विषा॑ वि॒धेम ।

येन॑ द्यौरु॒ग्रा पृथि॑वी च दृ॒ढे येन॑ सुवस् स्त॒भितं॑ ँयेन॒ नाकः॑ ।

यो अ॒न्तरि॑क्षे रज॒सो वि॒मानः॑ कस्मै॒ देवाय॑ ह॒विषा॑ वि॒धेम ।

आपो॑ ह॒ यन्म॒हती॑ वि॒श्वमा॒यन्-दक्ष॑न्दधाना॒ जन॑यन्ती-र॒ग्निं ।
ततो॑ दे॒वाना॑-न्नि॒रव॑र्त्ततासुरेकः॒ कस्मै॑ दे॒वाय॑ ह॒विषा॑ वि॒धेम ।
यश्चि॑दापो॒ महि॒ना पर्य॑पश्यद्-दक्ष॑न्दधाना॒ जन॑यन्ती-र॒ग्निं ।
यो दे॒वेष्व॑धि॒ देव॑ येक॒ आसी॑त् कस्मै॑ दे॒वाय॑ ह॒विषा॑ वि॒धेम ।

अ॒द्भ्यः॑ सं॒भूतो॑ हि॒रण्य॑गर्भ इत्य॒ष्टौ ।

ए॒ष हि॑ दे॒वः प्र॒दिशो॑ऽनु॒ सर्वाः॑ पूर्॒वो हि॑ जा॒तः स॒ उ॒ गर्भे॑ अ॒न्तः ।
स वि॒जाय॑मानः सज॒निष्य॑माणः प्र॒त्यङ्-मुखा॑ स्तिष्ठति वि॒श्वतो॑ मुखः।
वि॒श्वतश्च॑-क्षु॒रुत॑ वि॒श्वतो॑ मुखो वि॒श्वतो॑ ह॒स्त उ॒त वि॒श्वत॑स्पात् ।
सं बा॒हुभ्यां॑ नम॒ति सं प॑त॒त्रैर्-द्या॒वा पृ॒थि॒वी ज॒नय॑न् दे॒व ए॒कः ।
वे॒नस्त॑त् पश्यन् वि॒श्वा भु॑वनानि वि॒द्वान् यत्र॑ वि॒श्वं भ॑वत्ये॒क-नी॑ळं ।
यस्मि॑न्नि॒दं स॒ञ्च वि॒चैकं॑ स ओ॒तः प्रो॑तश्च वि॒भुः प्र॒जासु॑ ।
प्र॒तद्वो॑चे अ॒मृत॑न्नु वि॒द्वान् ग॒न्धर्वो॑ नाम नि॒हितं॑ गुहा॒सु । 3 (10)

T.A.6.1.4

त्रीणि॑ प॒दा नि॒हि॒ता गु॒हासु॑ यस्त॒द्वेद॑ स॒वितुः॑ पि॒ताऽस॑त् ।
स नो॑ ब॒न्धुर्-ज॒नि॒ता स वि॒धा॒ता धा॒मानि॑ वे॒द भुव॑नानि वि॒श्वा॑ ॥
यत्र॑ दे॒वा अ॒मृत॑मान-शा॒नास् तृ॒तीये॑ धा॒मान्य॑ भ्यैर॑यन्त ।
परि॑ द्यावापृ॒थि॒वी य॑न्ति स॒द्यः परि॑ लो॒कान् परि॑ दि॒शः परि॑ सु॒वः ।
ऋ॒तस्य॑ त॒न्तुं वि॑त॒तं वि॑चृत्य तद॒पश्य॑त् तद॒भव॑त् प्र॒जासु॑ ।
प॒रीत्य॑ लो॒कान् प॒रीत्य॑ भू॒तानि॑ प॒रीत्य॑ सर्वाः॑ प्र॒दिशो॑ दि॒शश्च॑ ।
प्र॒जाप॑तिः प्रथ॒मजा॑ ऋ॒तस्या॑त्म॒ना-ऽऽत्मा॑न-म॒भि-सं॑ब॒भूव॑ ।
सद॑सस्पति-म॒द्भु॒तं प्रि॒यमिन्द्र॑स्य का॒म्यं॑ । स॒निं मे॒धा म॑यासिषं ।
उ॒द्दी॒प्यस्व॑ जा॒तवे॑दो ऽप॒घ्नन्नि॑ऋ॒र्त्तिं म॑म । 4 (10)

T.A.6.1.5

प॒शूँश्च॑ म॒ह्यमा॑व॒ह जी॑वनञ्च दि॒शो दि॒श । मा॒नो हि॑ँसी ज्जा॒तवे॑दो
गा॒मश्च॑ पुरु॒षं ज॑गत् । अ॒बिभ्र॑द॒ग्न आ॑ग॒हि श्रि॒या मा॑ परि॒पात॑य ।
पुरु॑षस्य वि॒द्म स॒हस्रा॑क्षस्य॒ महा॑दे॒वस्य॑ धी॒महि॑ । तन्नो॑ रु॒द्रः

प्रचो॑दयात् । तत्पुरु॑षाय वि॒द्महे॑ महा॒देवाय॑ धीमहि ।
तन्नो॑ रुद्रः प्रचो॑दयात् । तत्पुरु॑षाय वि॒द्महे॑ वक्रतु॒ण्डाय॑ धीमहि ।
तन्नो॑ दन्तिः प्रचो॑दयात् । तत्पुरु॑षाय वि॒द्महे॑ चक्रतु॒ण्डाय॑ धीमहि । 5 (10)

T.A.6.1.6

तन्नो॑ नन्दिः प्रचो॑दयात् । तत्पुरु॑षाय वि॒द्महे॑ महा॒सेनाय॑ धीमहि ।
तन्नः॑ षण्मुखः प्रचो॑दयात् ।
तत्पुरु॑षाय वि॒द्महे॑ सुवर्णप॒क्षाय॑ धीमहि ।
तन्नो॑ गरुडः प्रचो॑दयात् ।
वेदा॑त्मनाय॑ वि॒द्महे॑ हिरण्यग॒र्भाय॑ धीमहि । तन्नो॑ ब्रह्म प्रचो॑दयात् ।
नारा॑यणाय॑ वि॒द्महे॑ वासुदे॒वाय॑ धीमहि । तन्नो॑ विष्णुः प्रचो॑दयात् ।
वज्र॑नखाय॑ वि॒द्महे॑ तीक्ष्ण-द॒ष्ट्राय॑ धीमहि । 6 (10)

T.A.6.1.7

तन्नो॑ नारसि॒ंहः प्रचो॑दयात् ।
भास्करा॑य वि॒द्महे॑ महद्द्युति॒कराय॑ धीमहि ।

तन्नो॑ आ॒दि॒त्यः प्र॒चो॒दया॑त् । वै॒श्वान॑राय वि॒द्महे॑ ला॒ली॒लाय॑ धीमहि ।
तन्नो॑ अ॒ग्निः प्र॒चो॒दया॑त् । का॒त्या॒य॒नाय॑ वि॒द्महे॑ क॒न्या॒कु॒मा॒रि॑ धीमहि ।
तन्नो॑ दु॒र्गिः प्र॒चो॒दया॑त् । स॒ह॒स्र॒पर॒मा दे॒वी श॒त॒मू॒ला श॒ता॒ङ्कु॒रा ।
सर्व॑ ह॒रतु॑ मे पा॒पं दू॒र्वा दुःस्व॑प्न नाशनी ।

काण्डा॑त् काण्डा॑त् प्र॒रोह॑न्ती प॒रुषः॑ प॒रुषः॑ परि । 7 (10)

T.A.6.1.8

ए॒वा नो॑ दू॒र्वे प्र॒तनु॑ स॒हस्रे॑ण श॒तेन॑ च ।
या श॒तेन॑ प्र॒तनो॑षि स॒हस्रे॑ण वि॒रोह॑सि ।
तस्या॑स्ते दे॒वीष्ट॑के वि॒धेम॑ ह॒विषा॑ व॒यं ।
अ॒श्वक्रान्ते॑ रथ॒क्रान्ते॑ वि॒ष्णुक्रान्ते॑ व॒सु॒न्ध॒रा ।
शि॒रसा॑ धा॒रयि॑ष्यामि रक्ष॒स्व मां प॒दे प॒दे ।
भूमि॑र्-धे॒नुर् ध॒रणी॑ लो॒कधा॑रिणी ।
उ॒धृता॑ऽसि व॒राहे॑ण कृ॒ष्णेन॑ श॒त बा॒हुना॑ ।
मृ॒त्तिके॑ ह॒न मे पा॒पं य॑न्मया दु॒ष्कृतं॑ कृतं ।

मृ॒त्तिके॑ ब्र॒ह्मद॑त्ताऽसि का॒शय॑पेनाभि॒मन्त्रि॑ता ।

मृ॒त्तिके॑ दे॒हि मे पु॒ष्टिं त्वयि॑ सर्वं प्र॒तिष्ठि॑तं । 8 (10)

T.A.6.1.9

मृ॒त्तिके॑ प्र॒तिष्ठि॑ते सर्वं तन्मे निर्णु॒द मृ॒त्तिके॑ ।

तया॑ ह॒तेन॑ पा॒पेन॑ गच्छामि पर॒मां गतिं॑ ।

यत॑ इन्द्र॒ भया॑महे ततो॑ नो अभयं कृ॒धि ।

म॒घवन्॑ छ॒ग्धि तव॑ तन्न ऊ॒तये॑ वि॒द्विषो॑ वि॒मृधो॑ जहि ।

स्व॒स्तिदा॑ वि॒शस्प॑तिर्-वृ॒त्रहा॑ वि॒मृधो॑ व॒शी ।

वृ॒षेन्द्रः॑ पु॒र ए॒तु नः॑ स्व॒स्तिदा॑ अभय॒ङ्करः॑ ।

स्व॒स्ति न॑ इन्द्रो॑ वृ॒द्धश्र॑वाः स्व॒स्ति नः॑ पू॒षा वि॒श्ववे॑दाः ।

स्व॒स्ति न॑स्ता॒क्षर्यो॑ अ॒रिष्ट॑नेमिः स्व॒स्ति नो॑ बृ॒हस्प॑तिर् दधातु ।

आपा॑न्त-म॒न्युस्-तृ॑प॒लप्र॑भर्मा धु॒निः शिमी॑वा॒ज्-छ॑रु॒माञ् ऋ॒जीषी॑ ।

सोमो॑ वि॒श्वान्य॑त॒सा व॑नानि ना॒र्वागिन्द्रं॑ प्र॒तिमा॑नानि दे॒भुः । 9 (10)

T.A.6.1.10

ब्र॒ह्मज॒ज्ञानं॑ प्र॒थमं॑ पु॒रस्ताद्-वि॒सी॒मतः॑ सु॒रुचो॑ वे॒न आ॑वः ।
 स बु॒ध्निया॑ उप॒मा अ॒स्य वि॒ष्टाः स॒तश्च॑ यो॒नि-म॒सतश्च॑ वि॒वः ।
 स्यो॒ना पृ॒थिवि॑ भ॒वा नृ॒क्षरा॑ नि॒वेशनी॑ । यच्छा॑ नः श॒र्म स॒प्रथाः॑ ॥
 गन्ध॑द्वा॒रां दु॒राध॑र्षां नि॒त्यपु॑ष्टां क॒रीषि॑णीं ।
 ई॒श्वरी॑ꣳ स॒र्वभू॑तानां ता॒मिहो॑प॒ह्वये॑ श्रियं ।
 श्री॑र्मे भ॒जतु॑ । अ॒लक्ष्मी॑र्मे न॒श्यतु॑ ।
 वि॒ष्णुमु॒खा वै दे॒वाः छन्दो॑-भि॒रिमा॑न् लो॒का-न॑नप॒जय्य॑-म॒भ्यज॑यन् ।
 महा॑ꣳ इन्द्रो॑ वज्र॒बाहुः॑ षोड॒शी श॒र्म यच्छ॑तु । 10 (10)

T.A.6.1.11

स्व॒स्ति नो॑ म॒घवा॑ करो॒तु ह॑न्तु पा॒प्मानं॑ योऽस्मा॑न् द्वेष्टि॑ ।
 सो॒मानꣳ स्वर॑णं कृ॒णुहि॑ ब्र॒ह्मण॑स्प॒ते । कक्षी॑वन्तं य औ॒शिजं॑ ।
 शरी॑रं य॒ज्ञश॑म॒लं कु॒सीदं॑ तस्मिन् थ॒सीद॑तु योऽस्मा॑न् द्वेष्टि॑ ।
 च॒रणं प॒वित्रं॑ वि॒ततं॑ पु॒राणं॑ येन॑ पू॒त-स्तर॑ति दुष्कृ॒तानि॑ ।

तेन पवित्रेण शुद्धेन पूता अति पाप्मान-मरातिं तरेम ।
सजोषा इन्द्र सगणो मरुद्भिः सोमं पिब वृत्रहञ्छूर विद्वान् ।
जहि शत्रूँ रप मृधो नुदस्वाथाभयं कृणुहि विश्वतो नः ।
सुमित्रा न आप ओषधयः सन्तु दुर्मित्रास्तस्मै
भूयासुर् योऽस्मान् द्वेष्टि यञ्च वयं द्विष्मः ।
आपो हिष्ठा मयो भुवस्ता न ऊर्जे दधातन । 11 (10)

T.A.6.1.12

महेरणाय चक्षसे । यो वः शिवतमो रस-स्तस्य भाजयते ह नः ।
उशती-रिव मातरः । तस्मा अरङ्गमामवो यस्य क्षयाय जिन्वथ ।
आपो जनयथा च नः । हिरण्यशृङं वरुणं प्रपद्ये तीर्थं मे देहि
याचितः । यन्मया भुक्त-मसाधूनां पापेभ्यश्च प्रतिग्रहः ।
यन्मे मनसा वाचा कर्मणा वा दुष्कृतं कृतं ।
तन्न इन्द्रो वरुणो बृहस्पतिः सविता च पुनन्तु पुनः पुनः ।

नमो॑ऽग्नये॑-ऽफ्सु॑मते॒ नम॑ इन्द्रा॑य नमो॑ वरुणा॑य नमो॑
वारु॑ण्यै नमो॑ऽद्भ्यः॑ । 12 (10)

T.A.6.1.13

यदपां॑ कू॒रं य॑दमे॒ध्यं य॑दशान्तं॑ तदप॑गच्छतात् ।
अत्या॑शना-दती॑पाना-द्वच्च॑ उ॒ग्रात् प्र॑तिग्रहात्॑ ।
तन्नो॑ वरु॒णो रा॒जा पा॒णिना॑ ह्यवम॑र्शतु ।
सोऽह॑मपापो॑ विर॒जो निर्मु॑क्तो मु॒क्तकि॑ल्बिषः ।
नाक॑स्य पृ॒ष्ठमा॑रुह्य गच्छेद् ब्र॒ह्म-स॑लोकतां ।
यश्चा॑फ्सु वरु॒णः स पु॑नात्वघम॑र्षणः ।
इ॒मं मे॑ ग॒ङ्गे य॑मुने सर॑स्वति शु॒तुद्रि॑ स्तोम॑ꣳ सच॒ता प॑रुष्णि॒या ।
अ॒सिक्नि॑या म॒रुद्वृ॑धे वि॒तस्त॑या-ऽऽर्जी॑कीये शृ॒णु॒ह्या सु॑षोम॒या ।
ऋ॒तञ्च स॑त्यञ्चा-भी॒द्धा त॑पसो ऽध्य॑जायत ।
ततो॑ रा॒त्रि-र॑जायत ततः॑ स॒मुद्रो॑ अ॒र्णवः॑ । 13 (10)

T.A.6.1.14

समु॒द्रा-दर्ण॑वा-दधि॑ सँव॑त्सरो अजा॑यत ।
अ॒होरा॑त्राणि वि॒दध॑द् विश्व॑स्य मि॒षतो॑ व॒शी ।
सू॒र्याच॑न्द्रमसौ धा॒ता य॑था पू॒र्व म॑कल्पयत् ।
दि॒वञ्च॑ पृ॒थि॒वीं चा॑न्तरि॒क्ष म॑थो सु॒वः ।
यत् पृ॒थि॒व्याꣳ रज॑स्स्व मा॒न्तरि॑क्षे वि॒रोद॑सी ।
इ॒माꣳ स्तदा॑पो वरु॒णः पु॒नात्व॑घमर्षणः ।
पुन॑न्तु वस॒वः पु॒नातु॑ वरु॒णः पु॒नात्व॑घमर्षणः ।
एष॑ भू॒तस्य॑ म॒ध्ये भु॑वनस्य गो॒प्ता ।
एष॑ पु॒ण्यकृ॑तां लो॒काने॑ष मृ॒त्योर् हि॒रण्म॑यं ॥
द्या॒वापृ॑थि॒व्योर् हि॒रण्म॑यꣳ सꣳश्रि॑तꣳ सु॒वः । 14 (10)

T.A.6.1.15

स नः॑ सु॒वः सꣳ शि॑शाधि ।
आर्द्रं॑ ज्वल॑ति ज्योति॑-रह॑मस्मि । ज्योति॑र्-ज्वल॑ति ब्र॒ह्माह॑मस्मि ।

योऽहमस्मि ब्रह्माहमस्मि । अहमस्मि ब्रह्माहमस्मि । अहमेवाहं मां
 जुहोमि स्वाहा । अकार्य-कार्यव कीर्णी स्तेनो भ्रूणहा गुरुतल्पगः ।
 वरुणो-ऽपामघमर्षण-स्तस्मात् पापात् प्रमुच्यते । रजोभूमिस्त्वमा
 रोदयस्व प्रवदन्ति धीराः । आक्रान्त्-समुद्रः प्रथमे विधर्म-ज्जनयन्
 प्रजा भुवनस्य राजा () । वृषा पवित्रे अधिसानो अव्ये बृहथ् सोमो
 वावृधे सुवान इन्दुः । 15 (11) (पुरस्ताद् - यशो - गुहासु - मम
 - चक्रतुण्डाय धीमहि - तीक्ष्णदृष्टाय धीमहि - परि - प्रतिष्ठितं
 - देभुर् - यच्छतु - दधातना- द्भ्यो - ऽर्णवः - सुवो -
 राजैकं च) (A1)

Special Korvai

रुद्रो रुद्रश्च दन्तिश्च नन्दिः षण्मुख एव च ।
 गरुडो ब्रह्म विष्णुश्च नारसिंहस्तथैव च ।
 आदित्योऽग्निश्च दुर्गिश्च क्रमेण द्वादशाम्भसि ।

Special Korvai

म म व च म सु वे ना व भा वै कात्यायनाय ।

अनुवाकं – 2

T.A.6.2.1

जा॒तवे॒द॒से सु॒न॒वाम॑ सोम॑-म॒राती॒यतो॑ नि॒द॒हाति॑ वे॒दः ।
स नः॑ पर्॒ष॒दति॑ दु॒र्गाणि॑ वि॒श्वा ना॒वेव॑ सि॒न्धुं दु॒रि॒ताऽत्य॑ग्निः ।
ताम॑ग्नि॒वर्णां॑ तप॒सा ज्व॑ल॒न्तीं वै॑रो॒चनीं॑ क॒र्म॒फ॒लेषु॑ जु॒ष्टां ॥
दु॒र्गा दे॒वीꣳ श॑रण॒म॒हं प्र॑पद्ये सु॒तर॑सि तर॒से नमः॑ ।
अ॒ग्ने त्वं पा॑र॒या न॒व्यो अ॒स्मान्थ् स्व॑स्ति-भि॒रति॑ दु॒र्गाणि॑ वि॒श्वा ॥
पू॒श्च पृ॒थ्वी ब॒हु॒ला न उ॒र्वी भ॒वा तो॑काय॒ तन॑याय॒ शँयोः॑ ।
वि॒श्वा॒नि नो दु॒र्गहा॑ जा॒तवे॒दः सि॒न्धुं न ना॒वा दु॒रि॒ताऽति॑पर्षि ।
अ॒ग्ने अ॒त्रि॒वन् मन॑सा गृ॒णानो॑ऽस्माकं बो॒ध्य॒वि॒ता त॒नूनां॑ ॥
पृ॒त॒नाजि॑तꣳ स॒ह॒मान॑-मु॒ग्रम॑ग्निꣳ हु॒वेम॑ पर॒माथ् स॒ध॒स्थात् ॥
स नः॑ पर्॒ष॒दति॑ दु॒र्गाणि॑ वि॒श्वा क्षा॒म॒द्दे॒वो अ॒ति दु॒रि॒ताऽत्य॑ग्निः () ।
प्र॒त्नोषि॑-क॒मीड्यो॑ अध्व॒रेषु॑ स॒नाच्च॑ होता न॒व्यश्च॑ स॒त्सि ।
स्वाञ्चा॑ग्ने त॒नुवं॑ पिप्रयस्वास्मभ्यञ्च सौ॒भ॒ग॒माय॑जस्व ।

गोभिर्-जुष्टमयुजो निषिक्तं तवेन्द्र विष्णो-रनुसञ्चरेम ।

नाकस्य पृष्ठमभि सँवसानो वैष्णवींँ लोक इह मादयन्तां । 16 (14)

(दुरिताऽत्यग्निश्चत्वारि च) (A2)

अनुवाकं - 3

T.A.6.3.1

भू-रन्न-मग्नये पृथिव्यै स्वाहा , भुवोऽन्नं वायवेऽन्तरिक्षाय स्वाहा ,

सुवरन्न-मादित्याय दिवे स्वाहा ,

भूर्भुवस्सुव-रन्नं चन्द्रमसे दिग्भ्यः स्वाहा ,

नमो देवेभ्यः स्वधा पितृभ्यो भूर्भुवस्सुव-रन्नमों । 17 (1)

अनुवाकं - 4

T.A.6.4.1

भू-रग्नये पृथिव्यै स्वाहा , भुवो वायवेऽन्तरिक्षाय स्वाहा ,

सुवरादित्याय दिवे स्वाहा , भु-र्भुवस्सुव-श्चन्द्रमसे दिग्भ्यः

स्वाहा , नमो देवेभ्यः स्वधा पितृभ्यो भूर्भुवस्सुव-रग्न ओं । 18 (1)

अनुवाकं – 5

T.A.6.5.1

भू-र॒ग्नये॑ च॒ पृथि॒व्यै च॑ म॒हते च॒ स्वाहा॑ ,
भुवो॑ वा॒यवे॑ चा॒न्तरि॑क्षा॒य च॑ म॒हते च॒ स्वाहा॑ ,
सुव॑रादि॒त्याय॑ च॒ दिवे॑ च॒ म॒हते च॒ स्वाहा॑ ,
भू-भु॒वस्सुव॑-श्च॒न्द्रम॑से च॒ नक्ष॑त्रेभ्यश्च॒ दिग्भ्य॑श्च॒ म॒हते च॒ स्वाहा॑ ,
नमो॑ दे॒वेभ्यः॑ स्व॒धा पि॒तृभ्यो॑ भु॒र्भुव॑स्सुव॒र् मह॑रों । 19 (1)

अनुवाकं – 6

T.A.6.6.1

पा॒हि नो॑ अ॒ग्न ए॒नसे॑ स्वाहा । पा॒हि नो॑ वि॒श्ववे॑द॒से स्वाहा॑ ।
य॒ज्ञं पा॒हि वि॒भाव॑सो स्वाहा । सर्वं॑ पा॒हि श॑त॒क्रतो॑ स्वाहा । 20 (4)

अनुवाकं – 7

T.A.6.7.1

पा॒हि नो॑ अ॒ग्न ए॒कया॑ । पा॒ह्युत॑ द्वि॒तीय॑या । पा॒ह्यूर्जं॑ तृ॒तीय॑या ।
पा॒हि गी॒र्भि-श्च॑त॒सृभि॑र् व॒सो स्वाहा॑ ॥ 21 (4)

अनुवाकं - 8

T.A.6.8.1

यश्छन्दसा-मृषभो विश्वरूपः-छन्दोभ्यः छन्दा॑स्या विवेश॑ ।
सचा॑ शिष्यः पुरो वाचो॑पनिष-दिन्द्रो॑ ज्येष्ठ इन्द्रियाय ऋषिभ्यो॑
नमो॑ देवेभ्यः स्वधा पितृभ्यो भूर्भुवस्सुवः छन्द ओं । 22 (2)

अनुवाकं - 9

T.A.6.9.1

नमो ब्रह्मणे धारणं मे अस्त्व-निराकरणं-धारयिता भूयासं
कर्णयोः श्रुतं माच्यो॑द्वं ममामुष्य ओं । 23 (1)

अनुवाकं - 10

T.A.6.10.1

ऋतं तपः सत्यं तपः श्रुतं तपः शान्तं तपो दम स्तपः शमस्तपो
दानं तपो यज्ञं तपो भूर्भुवस्सुवर् -ब्रह्मै-तदुपास्यै-तत्तपः । 24 (1)

अनुवाकं - 11

T.A.6.11.1

यथा वृक्षस्य संपुष्पितस्य दूराद् गन्धो वात्ये॑वं पुण्यस्य कर्मणो॑
दूराद् गन्धो वाति यथाऽसिधारां कर्त्ते॑ऽवहिता-मवक्रामे यद्युवे युवे
हवा विह्वयिष्यामि कर्त्तं पतिष्यामीत्येव-ममृता-दात्मानं

जुगुप्सेत् । 25 (1)

अनुवाकं – 12

T.A.6.12.1

अ॒णो-र॒णी॒यान् म॒हतो म॒ही॒या-ना॒त्मा गु॒हा॒यां नि॒हि॒तोऽस्य ज॒न्तोः ।

तम॑क्र॒तुं प॒श्यति वी॒तशो॒को धा॒तुः प्र॒सा॒दान्-म॒हि॒मान॑मी॒शं ।

स॒प्त प्रा॒णाः प्र॒भव॑न्ति तस्मा॑त् स॒प्तार्चि॑षः स॒मि॒धः स॒प्त जि॒ह्वाः ।

स॒प्त इ॒मे लो॒का येषु॑ चर॑न्ति प्रा॒णा गु॒हा॒शया॑-नि॒हि॒ताः स॒प्त स॒प्त ।

अतः॑ स॒मु॒द्रा गि॒रय॑श्च स॒र्वेऽस्मा॑त् स्य॒न्दन्ते॑ सि॒न्ध॒वः स॒र्वरू॑पाः ।

अत॑श्च वि॒श्वा ओष॑धयो रसा॑च्च येनै॑ष भू॒त-स्ति॑ष्ठत्यन्तरा॒त्मा ।

ब्र॒ह्मा दे॒वानां॑ प॒दवीः क॒वी॒ना-मृ॒षिर्-वि॒प्रा॒णां म॒हि॒षो मृ॒गाणां॑ ।

श्ये॒नो गृ॒ध्राणा॑ꣳ स्व॒धि॒तिर्-व॒ना॒नाꣳ सोमः॑ प॒वि॒त्र म॒त्ये॒तिरे॒भन् ।

अ॒जा मे॒कां लो॒हित॑-शु॒क्ल-कृ॒ष्णां ब॒र्हीं प्र॒जां ज॒नय॑न्तीꣳ स॒रू॒पां ।

अ॒जो ह्ये॒को जु॒षमा॑णोऽनु॒शेते॑ जहा॑त्ये॒नां

भु॒क्त-भो॑गाम॒जोऽन्यः॑ । 26 (10)

T.A.6.12.2

ह॒ऽसः शुचि॑षद् वसु॑-रन्तरि॑क्ष-स॒द्धोता॑ वेदि॑ष-दति॑थिर्-दुरो॑णसत् ।
 नृष॑द्वर-सदृ॑त-सद् व्यो॑म-सद॑ब्जा गो॒जा ऋ॑तजा
 अ॒द्रिजा॑ ऋ॒तं बृ॑हत् । घृ॒तं मि॑मिक्षिरे घृ॒तम॑स्य योनि॑र्-घृ॒ते श्रि॑तो
 घृ॒तमु॑वस्य धाम । अ॒नुष्व॑धमाव॒ह मा॑दयस्व स्वाहा॑ कृतं
 वृष॑भ वक्षि ह॒व्यं । स॒मुद्रा॑ दू॒र्मिर्-म॑धुमा॒ऽउ॒दार-दु॒पा॒ऽशु॒ना
 स॒ममृ॑तत्व मान॑ट् । घृ॒तस्य॑ नाम गु॒ह्यं य॑दस्ति जि॒ह्वा दे॒वाना॑-
 म॒मृ॑तस्य नाभिः । व॒यं नाम॑ प्रब्र॒वामा॑ घृ॒तेना॑स्मिन्. य॒ज्ञे धा॑रयामा
 न॒मोभिः॑ । उप॑ ब्र॒ह्मा शृ॑णवच्छस्यमा॒नं च॑तुः शृ॒ङ्गो ऽव॑मीद् गौर
 ए॒तत् । च॒त्वारि॑ शृ॒ङ्गा त्रयो॑ अस्य पा॒दा द्वे शी॑र्षे
 स॒प्त ह॑स्तासो अस्य । त्रि॒धा ब॑द्धो वृष॒भो रो॑रवीति म॒हो
 दे॒वो म॑र्त्या॒ऽआ॒विवे॑श । 27 (10)

T.A.6.12.3

त्रि॒धा हि॒तं प॑णिभिर् गु॒ह्यमा॑नं गवि॑-दे॒वासो॑ घृ॒तम॑न्वविन्दन् ।
 इन्द्र॑ एक॒ऽसूर्य॑ एकं ज॒जान॑ वे॒ना दे॒कऽस्व॑धया निष्ट॑तक्षुः ।

यो देवानां प्रथमं पुरस्ताद् विश्वाधियो रुद्रो महर्षिः । हिरण्यगर्भं
पश्यत जायमानं सनो देवः शुभया स्मृत्या संयुनक्तु ।

यस्मात्परं नापर मस्ति किञ्चिद्यस्मान् नाणीयो न ज्यायौऽस्ति
कश्चित् । वृक्ष इव स्तब्धो दिवितिष्ठ-त्येकस्तेनेदं पूर्णं पुरुषेण सर्वं ।

न कर्मणा न प्रजया धनेन त्यागेनैके अमृतत्व-मानशुः ।

परेण नाकं निहितं गुहायां विभ्राजदेतद् यतयो विशन्ति ।

वेदान्त विज्ञान-सुनिश्चितार्थाः सन्यास योगाद्यतयः शुद्ध सत्त्वाः ।

ते ब्रह्मलोके तु परान्तकाले परामृतात् परिमुच्यन्ति सर्वे () ।

दहं विपापं परमैश्वर्यं भूतं यत् पुण्डरीकं पुरमध्य सऽस्थं ।

तत्रापि दहं गगनं विशोक-स्तस्मिन्. यदन्तस्त-दुपासितव्यं ।

यो वेदादौ स्वरः प्रोक्तो वेदान्ते च प्रतिष्ठितः ।

तस्य प्रकृति-लीनस्य यः पर सः महेश्वरः । 28 (14)

(अजोऽन्य - आविवेश - सर्वे चत्वारि च) (A12)

अनुवाकं - 13

T.A.6.13.1

सहस्र॑शीर्षं॑ दे॒वं वि॒श्वाक्षं॑ वि॒श्वं शं॑ भु॒वं ।

वि॒श्वं ना॒राय॑णं दे॒वमक्ष॑रं पर॒मं पदं॑ ।

वि॒श्वतः॑ पर॒मान्नित्यं॑ वि॒श्वं ना॒राय॑णञ् हरिं॑ ।

वि॒श्वमे॒वेदं॑ पु॒रुष-स्तद् वि॒श्वमु॑पजीवति ।

पतिं॑ वि॒श्वस्या॒त्मेश्व॑रञ् शाश्व॑तञ् शि॒वम॑च्युतं ।

ना॒राय॑णं मा॒हाज्ञे॑यं वि॒श्वात्मा॑नं परा॒यणं॑ ।

ना॒राय॑ण परो॑ ज्योति॒रात्मा॑ ना॒राय॑णः परः॑ ।

ना॒राय॑ण परं॑ ब्र॒ह्म तत्त्वं॑ ना॒राय॑णः परः॑ ।

ना॒राय॑ण परो॑ ध्या॒ता ध्या॒नं ना॒राय॑णः परः॑ ।

यच्च॑ किञ्चि॒ज्-जग॑त् सर्वं॑ दृ॒श्यते॑ श्रूय॒तेऽपि॑ वा । 29 (10)

T.A.6.13.2

अन्त॑र् ब॒हिश्च॑ तथ् सर्वं॑ व्या॒प्य ना॒राय॑णः स्थि॒तः ।

अनन्त॑ म॒व्ययं॑ क॒वि॒ꣳ स॒मु॒द्रे॒ऽन्तं॑ वि॒श्व शं॑भु॒वं ।
 प॒द्म॒को॒श-प्र॑ती॒का॒श॒ꣳ हृ॒दयं॑ चा॒प्य॒धो॒मुखं॑ ।
 अ॒धो नि॒ष्ट्या वि॑त॒स्त्या॒न्ते ना॒भ्यामु॑परि तिष्ठति ।
 ज्वा॒ल॒मा॒ला कु॑लं भा॒ती वि॒श्वस्या॑यतनं महत् ।
 स॒न्तत॑ꣳ शि॒लाभि॑स्तु ल॒ंब॒त्या को॒शस॑न्निभं ।
 तस्या॑न्ते सु॒षि॒रꣳ सू॒क्ष्मं तस्मि॑न्त् सर्वं॑ प्रतिष्ठितं ।
 तस्य॑ म॒ध्ये म॒हान॑ग्निर् वि॒श्वार्चि॑र् वि॒श्वतो॑ मुखः ।
 सोऽग्र॑भुग् वि॒भज॑न् तिष्ठन्-ना॒हार-म॒जरः॑ क॒विः ।
 ति॒र्य॒गूर्ध्व॑ म॒धः शायी॑ रश्मयस्तस्य सन्तता () ।
 स॒न्ताप॑यति स्वं दे॒हमा॑पादतल मस्तकः ।
 तस्य॑ म॒ध्ये वह्नि॑शिखा अ॒णीयो॑र्ध्वा व्यवस्थितः ।
 नी॒लतो॑ यद म॒ध्य॒स्थाद् वि॒द्युल्ले॑खेव भास्वरा ।
 नी॒वार॑ शू॒कव॑त्तन्वी पी॒ता भा॑स्वत्यणूपमा ।

तस्याः शिखाया मध्ये परमात्मा व्यवस्थितः ।

स ब्रह्म स शिवः स हरिः सेन्द्रः सोऽक्षरः परमः स्वराट् । 30 (16)

(अपि वा - सन्तता षट् च) (A13)

अनुवाकं - 14

T.A.6.14.1

आदित्यो वा एष एतन् मण्डलं तपति तत्र ता ऋचस्तदृचा मण्डलं
स ऋचां लोकोऽथय एष एतस्मिन् मण्डलेऽचिर् दीप्यते तानि
सामानि स साम्नां लोकोऽथ य एष एतस्मिन् मण्डलेऽर्चिषि
पुरुषस्तानि यजूंषि स यजुषा मण्डलं स यजुषां लोकः सैषा
त्रय्येव विद्या तपति य एषोऽन्त-रादित्ये हिरण्मयः पुरुषः । 31 (1)

अनुवाकं - 15

T.A.6.15.1

आदित्यो वै तेज ओजो बलं यश-श्चक्षुः श्रोत्रमात्मा मनो मन्युर्-
मनुर्-मृत्युः सत्यो मित्रो वायुराकाशः प्राणो लोकपालः कः किं
कं तथ् सत्यमन्न-ममृतो जीवो विश्वः कतमः स्वयंभु ब्रह्मै तदमृत
एष पुरुष एष भूताना-मधिपतिर्-ब्रह्मणः सायुज्यं सलोकता-

मा॒प्नो॒-त्ये॒तासा॒मे॒व दे॒वता॒नां॑ सा॒युज्य॑ सा॒र्ष्टि॒तां॑ स॒मान
लो॒कता॑-मा॒प्नोति॑ य ए॒वं वे॒दे॒त्युप॑निषत् । 32 (1)

अनुवाकं – 16

T.A.6.16.1

नि॒धन॑प॒तये॑ नमः । नि॒धन॑प॒तान्ति॑काय नमः ।

ऊ॒र्ध्वाय॑ नमः । ऊ॒र्ध्वलि॑ङ्गाय नमः ।

हि॒रण्या॑य नमः । हि॒रण्य॑लि॒ङ्गाय॑ नमः ।

सु॒वर्णा॑य नमः । सु॒वर्ण॑लि॒ङ्गाय॑ नमः ।

दि॒व्याय॑ नमः । दि॒व्यलि॑ङ्गाय नमः । 33 (10)

T.A.6.16.2

भ॒वाय॑ नमः । भ॒वलि॑ङ्गाय नमः ।

श॒र्वाय॑ नमः । श॒र्वलि॑ङ्गाय नमः ।

शि॒वाय॑ नमः । शि॒वलि॑ङ्गाय नमः ।

ज्व॒लाय॑ नमः । ज्व॒ललि॑ङ्गाय नमः ।

आ॒त्माय॑ नमः । आ॒त्मलि॑ङ्गाय नमः ।

परमा॒य नमः॑ । परमलिङ्गा॒य नमः॑ ।

ए॒तत्सोम॑स्य॒ सूर्य॑स्य॒ सर्व॑लिङ्गं॒ स्थाप॑यति

पाणि॑मन्त्रं पवि॒त्रं । 34 (13)

अनुवाकं - 17

T.A.6.17.1

सद्यो॑जातं प्रपद्यामि॒ सद्यो॑जाताय॒ वै नमो॑ नमः॑ ।

भवे॑ भवे॑ नाति॑भवे॒ भवस्व॑ मां । भवो॑द् भवाय॒ नमः॑ । 35 (3)

अनुवाकं - 18

T.A.6.18.1

वाम॑देवाय॒ नमो॑ ज्येष्ठा॒य नमः॑ श्रेष्ठा॒य नमो॑ रुद्रा॒य नमः॑ काला॒य नमः॑

कल॑विकरणा॒य नमो॑ बल॑विकरणा॒य नमो॑ बला॒य नमो॑

बल॑प्रमथना॒य नमः॑ सर्व॑भूतदमना॒य नमो॑ मनो॑न्मना॒य नमः॑ । 36 (1)

अनुवाकं - 19

T.A.6.19.1

अघो॑रेभ्योऽथ॒ घो॑रेभ्यो॒ घोर॑घोरतरेभ्यः॑ ।

सर्वे॑भ्यः॒ सर्व॑ शर्वे॑भ्यो॒ नमस्ते॑ अस्तु॒ रुद्र॑रूपेभ्यः॑ । 37 (2)

अनुवाकं – 20

T.A.6.20.1

तत्पुरुषाय विद्महे महादेवाय धीमहि ।

तन्नो रुद्रः प्रचोदयात् ॥ 38 (2)

अनुवाकं – 21

T.A.6.21.1

ईशानः सर्वविद्याना- मीश्वरः सर्वभूतानां ब्रह्माधिपतिर् ब्रह्मणोऽधिपतिर्
ब्रह्मा शिवो मे अस्तु सदाशिवो । 39 (1)

अनुवाकं – 22

T.A.6.22.1

नमो हिरण्यबाहवे हिरण्यवर्णाय हिरण्यरूपाय हिरण्यपतये ऽंबिकापतये
उमापतये पशुपतये नमो नमः । 40 (1)

अनुवाकं – 23

T.A.6.23.1

ऋतं सत्यं परं ब्रह्म पुरुषं कृष्णपिङ्गलं ।

ऊर्ध्वरेतं विरूपाक्षं विश्वरूपाय वै नमो नमः । 41 (2)

अनुवाकं – 24

T.A.6.24.1

सर्वो॑ वै रु॒द्रस्तस्मै॑ रु॒द्राय॑ नमो॑ अस्तु ।

पुरु॑षो वै रु॒द्रः सन्म॑हो नमो॑ नमः॑ ।

विश्वं॑ भू॒तं भुव॑नं चि॒त्रं बहु॑धा जा॒तं जाय॑मानं च॒ यत् ।

सर्वो॑ ह्येष रु॒द्रस्तस्मै॑ रु॒द्राय॑ नमो॑ अस्तु । 42 (4)

अनुवाकं – 25

T.A.6.25.1

क॒द्रु॒द्राय॑ प्रचे॑तसे मी॒ढुष्ट॑माय॒ तव्य॑से । वो॒चेम॒ शन्त॑म॒ हृदे॑ ।

सर्वो॑ ह्येष रु॒द्रस्तस्मै॑ रु॒द्राय॑ नमो॑ अस्तु । 43 (3)

अनुवाकं – 26

T.A.6.26.1

यस्य॑ वै क॒ङ्कत्य॑ग्नि-हो॒त्रह॑वणी॒ भव॑ति प्र॒त्येवा॑-स्याहु॒तय॑-

स्तिष्ठ॑न्त्यथो॒ प्रति॑ष्ठित्यै । 44 (1)

अनुवाकं – 27

T.A.6.27.1

Expansion for कृणुष्व पाज इति पञ्च ।

(This Expansion is appearing in T.S.1.2.14.1

कृ॒णु॒ष्व पाजः॑ प्र॒सि॒ति॒न्न पृ॒थ्वीं॑ या॒हि रा॒जे वा॒मवा॑ꣳ इ॒भेन॑ ।

तृ॒ष्ठीम॒नु प्र॒सि॒तिं द्रू॒णानो॑ऽस्ताऽसि॒ वि॒ध्य र॒क्ष स॒स्तपि॑ष्ठैः । 1

तव॑ भ्र॒मास॑ आ॒शुया॑ प॒तन्त्य॑नु स्पृ॒श धृ॒षता॑ शो॒शुचा॑नः ।

तपू॑ꣳष्य॒ग्ने जु॒ह्वा प॒तंगान॑ स॒न्दि॒तो वि॒सृज॑ वि॒ष्व गु॒ल्काः । 2

प्र॒ति॒स्प॒शो वि॒सृज॑ तू॒र्णि त॒मो भ॒वा पा॒युर् वि॒शो अ॒स्या अ॒द॒ब्धः ।

यो नो॑ दू॒रे अ॒घ॒शꣳ सो॒यो अ॒न्त्य॑ग्ने मा॒कि॒ष्टे व्य॑थि॒रा

द॒धर्षी॑त् । 3

उ॒द॒ग्ने ति॒ष्ठ प्र॒त्या त॑नु॒ष्वन्य॑ मि॒त्राꣳ ओ॒षता॑त् ति॒ग्महे॑ते ।

यो नो॑ अ॒राति॑ꣳ स॒मि॒धान॑ च॒क्रे नी॒चातं॑ ध॒क्ष्यत॑ स॒न्न शु॒ष्कं॑ ॥ 4

ऊ॒र्ध्वो भ॒व प्र॒ति॒वि॒ध्या-॒ध्य॒स्मदा॑ वि॒ष्कृ॑णुष्व दै॒व्या॑न्य॒ग्ने ।

अ॒व॒स्थि॒रा त॑नु॒हि या॒तु जू॑नां जा॒मि॒मजा॑मिं प्र॒मृ॑णी॒हि श॒त्रून्॑ ॥ 5

कृ॒णु॒ष्व पा॒ज इति॑ पञ्च । 45 (1)

अनुवाकं - 28

T.A.6.28.1

अ॒दि॒तिर्-दे॒वा ग॒न्ध॒र्वा म॒नु॒ष्याः पि॒तरो॑-ऽसु॒रा-स्तेषां॑ स॒र्व भू॒तानां॑
मा॒ता मे॒दिनी॑ म॒हता॑ म॒ही सा॒वित्री॑ गा॒यत्री॑ जग॒त्युर्वी॑ पृ॒थ्वी ब॒हुला॑
वि॒श्वा भू॒ता क॒त॒मा का॒या सा स॒त्ये-त्य॒मृते॑ति॒ वसि॑ष्ठः । 46 (1)

अनुवाकं - 29

T.A.6.29.1

आपो॑ वा इ॒दं स॒र्वं वि॒श्वा भू॒तान्यापः॑ प्रा॒णा वा आपः॑ प॒शव॑
आपो॑ऽन्न॒मापो॑ -ऽमृ॒तमापः॑ स॒म्राडापो॑ वि॒राडापः॑ स्व॒राडापः॑
छ॒न्दाऽस्यापो॑ ज्योती॑ऽष्यापो॑ यजू॑ऽष्यापः॑ स॒त्यमापः॑ स॒र्वा
दे॒वता॑ आपो॑ भूर्भुव॑स्सुव॒राप ओं । 47 (1)

अनुवाकं - 30

T.A.6.30.1

आपः॑ पुन॒न्तु पृ॒थि॒वीं पृ॒थि॒वी पू॒ता पु॒नातु॑ मां ।
पुन॒न्तु ब्र॒ह्मण॑स्पति॒र्ब्रह्म॑ पू॒ता पु॒नातु॑ मां ।
यदु॑च्छिष्ट-म॒भौज्यं॑ य॒द्वा दु॒श्चरि॑तं मम ।

सर्वं पुनन्तु मामापो-ऽसताञ्च प्रतिग्रहञ् स्वाहा । 48 (4)

अनुवाकं – 31

T.A.6.31.1

अग्निश्च मा मन्युश्च मन्युपतयश्च मन्युकृतेभ्यः ।

पापेभ्यो रक्षन्तां । यदह्ना पापमकार्षं ।

मनसा वाचा हस्ताभ्यां । पद्भ्या-मुदरेण शिशना ।

अहस्तदवलुंपतु । यत्किञ्च दुरितं मयि ।

इदमह-माममृत योनौ । सत्ये ज्योतिषि जुहोमि स्वाहा । 49 (9)

अनुवाकं – 32

T.A.6.32.1

सूर्यश्च मा मन्युश्च मन्युपतयश्च मन्युकृतेभ्यः ।

पापेभ्यो रक्षन्तां । यद् रात्रिया पापमकार्षं ।

मनसा वाचा हस्ताभ्यां । पद्भ्या-मुदरेण शिशना ।

रात्रि-स्तदवलुंपतु । यत्किञ्च दुरितं मयि ।

इदमह-माममृत योनौ । सूर्ये ज्योतिषि जुहोमि स्वाहा । 50 (9)

अनुवाकं - 33

T.A.6.33.1

ओ॒मित्ये॒काक्ष॑रं ब्र॒ह्म । अ॒ग्नि॒र्दे॒वता॑ ब्र॒ह्म इ॒त्यार्ष॑ ।

गा॒य॒त्रं छ॒न्दं॑ प॒रमा॑त्मं स॒रूपं॑ । सा॒यु॒ज्यं वि॑नियोगं । 51 (4)

अनुवाकं - 34

T.A.6.34.1

आ॒या॒तु व॒रदा॑ दे॒वी अक्ष॑रं ब्र॒ह्म सं॒मितं॑ ।

गा॒य॒त्रीं छ॒न्द॒सां मा॑तेदं ब्र॒ह्म जु॒षस्व॑ मे ।

यद॒ह्मात् कुरु॑ते पा॒पं तद॒ह्मात् प्र॑तिमुच्यते ।

यद् रा॒त्रिया॑त् कुरु॑ते पा॒पं तद् रा॒त्रिया॑त् प्र॑तिमुच्यते ।

सर्व॑ वर्णे॒ महा॑दे॒वि स॒न्ध्या वि॒द्ये सर॑स्वति । 52 (5)

अनुवाकं - 35

T.A.6.35.1

ओ॒जो॒ऽसि स॒हो॒ऽसि ब॒लम॑सि भ्रा॒जो॒ऽसि दे॒वानां॑ धा॒मना॑मा॒ऽसि

वि॒श्वम॑सि वि॒श्वायुः॑ स॒र्वम॑सि स॒र्वायु॑-र॒भिभू॑रों-गा॒य॒त्री-मा॒वा॒हया॑मि

सा॒वि॒त्री-मा॒वा॒हया॑मि सर॑स्वती-मा॒वा॒हया॑मि छ॒न्दर्षी॑-ना॒वा॒हया॑मि

श्रिय-मावाहयामि गायत्रिया गायत्री च्छन्दो विश्वामित्र

ऋषिः सविता देवताऽग्निर्मुखं ब्रह्मा शिरो विष्णुर्हृदयं रुद्रः

शिखा पृथिवीयोनिः प्राणापान-व्यानोदान-समाना सप्राणा श्वेतवर्णा

साङ्ख्यायन-सगोत्रा गायत्री चतुर्विंशत्यक्षरा त्रिपदा

षट्कुक्षिः पञ्च शीर्षोपनयने विनियोग, ओं भूः । ओं भुवः ।

ओं सुवः । ओं महः । ओं जनः । ओं तपः । ओं सत्यं ।

ओं तथ् सवितुर्वरेण्यं भर्गो देवस्य धीमहि ।

धियो यो नः प्रचोदयात् ।

ओमापो ज्योती रसोऽमृतं ब्रह्म भूर्भुवस्सुवरो । 53 (10)

अनुवाकं – 36

T.A.6.36.1

उत्तमे शिखरे जाते भूम्यां पर्वत मूर्धनि ।

ब्राह्मणेभ्यो-ऽभ्यनुज्ञाता गच्छ देवि यथासुखं । स्तुतो मया वरदा

वेदमाता प्रचोदयन्ती पवने द्विजाता । आयुः पृथिव्यां-द्रविणं

ब्रह्मवर्चसं मह्यं दत्वा प्रजातुं ब्रह्मलोकं । 54 (4)

अनुवाकं - 37

T.A.6.37.1

घृ॒णिः सूर्य॑ आदि॒त्यो न प्रभा॑-वा॒त्यक्ष॑रं । मधु॑क्षरन्ति तद् र॒सं ।

स॒त्यं वै तद् र॒स-मा॒पो ज्योती॑र॒सोऽमृतं॑ ब्र॒ह्म

भूर्भुव॑स्सुव॒रों । 55 (3)

अनुवाकं - 38

T.A.6.38.1

ब्र॒ह्म मे॒तु मां॑ । मधु॑ मे॒तु मां॑ । ब्र॒ह्म-मे॒व मधु॑ मे॒तु मां॑ ।

यास्ते॑ सोम प्र॒जाव॑त्सो-ऽभि॒सो अ॒हं । दु॒ष्व॒प्न॒हन् दु॒रुष्व॑ह ।

यास्ते॑ सोम प्रा॒णाऽस्तां॑ जु॒होमि॑ । त्रि॒सु॒पर्ण॑ मया॒चितं॑ ब्रा॒ह्म॒णाय॑
द॒द्यात् । ब्र॒ह्म॒ह॒त्यां वा॑ ए॒ते घ्न॑न्ति । ये ब्रा॒ह्म॒णा-स्त्रि॑सु॒पर्णं॑ प॒ठन्ति॑ ।

ते सोमं॑ प्राप्नुवन्ति । आ॒स॒ह॒स्रात् प॑न्ति पुनन्ति । ओं । 56 (12)

अनुवाकं - 39

T.A.6.39.1

ब्र॒ह्म मे॒धया॑ । मधु॑ मे॒धया॑ । ब्र॒ह्ममे॒व मधु॑ मे॒धया॑ । अ॒द्या नो॑ दे॒व
स॒वितः॑ प्र॒जाव॑त्सा॒वीः सौ॒भ॒गं । परा॑ दु॒ष्व॒प्निय॑ सु॒व ।

वि॒श्वानि॑ दे॒व स॒वित॑र्-दु॒रि॒तानि॑ परा॒सुव॑ । यद् भ॒द्रं तन्म॑ आ॒सुव॑ ।

मधु॒वा॒ता ऋ॒ता॒य॒ते मधु॑क्षर॒न्ति सि॒न्ध॒वः । मा॒ध्वी॒र्नः स॒न्त्वोष॑धीः ।
मधु॑न॒क्त मु॒तोष॑सि मधु॑म॒त् पा॒र्त्थि॒व॒ञ् रजः॑ । मधु॑द्यौ॒रस्तु॑ नः पि॒ता ।
मधु॑मा॒न्नो व॒नस्प॑तिर्-मधु॑मा॒ञ् अस्तु॑ सूर्यः । मा॒ध्वी॒र्गावो॑ भव॒न्तु नः॑ ।
य इ॒मं त्रि॑सु॒पर्ण॑-मया॒चितं॑ ब्रा॒ह्म॒णाय॑ दद्यात् ।
भ्रू॒णह॑त्यां वा ए॒ते घ्न॑न्ति । ये ब्रा॒ह्म॒णा-स्त्रि॑सु॒पर्णं॑ पठ॑न्ति ।
ते सो॒मं प्रा॑प्नुव॒न्ति । आ॒सह॑स्रात् पं॒क्तिं पु॑न॒न्ति । ओं । 57 (19)

अनुवाकं – 40

T.A.6.40.1

ब्र॒ह्म मे॒धवा॑ । मधु॑ मे॒धवा॑ । ब्र॒ह्म मे॒व मधु॑ मे॒धवा॑ ।
ब्र॒ह्मा दे॒वानां॑ प॒दवीः॑ क॒वीना॑-मृ॒षिर् वि॒प्राणां॑ म॒हिषो॑ मृ॒गाणां॑ ।
इ॒येनो॑ गृ॒द्ध्राणा॑ञ् स्व॒धिति॑र्-व॒नाना॑ञ् सो॒मः प॒वित्र॑-म॒त्येति॑ रे॒भन् ।
ह॒ञ्सः शु॒चिष॑द् वसु॒रन्तरि॑क्ष स॒द्धोता॑- वे॒दिष॑-द॒तिथि॑र्-
दु॒रोण॑सत् । नृ॒षद्व॑र-स॒दृत॑-सद् व्यो॒म-स॒दब्जा॑- गो॒जा ऋ॒तजा॑
अ॒द्रिजा॑ ऋ॒तं बृ॒हत् । ऋ॒चेत्वा॑ रु॒चेत्वा॑ स॒मिथ् स्र॑व॒न्ति स॒रितो॑ न
धे॒नाः । अ॒न्तर् हृ॒दा म॒नसा॑ पू॒यमा॑नाः । घृ॒तस्य॑ धा॒रा अ॒भिचा॑क॒शीमि॑ ।

हिरण्ययो॑ वेत॒सो म॒ध्य आ॒सां । तस्मि॑न्त् सु॒पर्णो॑ म॒धुकृ॑त् कु॒लायी॑
 भ॒जन्नास्ते॑ म॒धु दे॒वता॑भ्यः । तस्या॑ स॒ते हर॑यः स॒प्तती॑रे स्व॒धां
 दु॒हाना॑ अ॒मृत॑स्य धा॒रां । य इ॒दं त्रि॑सुपर्ण-मया॒चितं॑ ब्रा॒ह्मणा॑य
 दद्यात् । वी॒रह॑त्यां वा ए॒ते घ्न॑न्ति । ये ब्रा॒ह्मणा॑-स्त्रि॒सुपर्णं॑ प॒ठन्ति॑ ।
 ते सोमं॑ प्राप्नु॒वन्ति॑ । आ॒सह॑स्रात् पं॒क्तिं पु॑नन्ति । ओं । 58 (19)

अनुवाकं - 41

T.A.6.41.1

मे॒धादे॒वी जु॒षमा॑णा न आ॒गाद् वि॒श्वाची॑ भ॒द्रा सु॑म॒नस्य॑ मा॒ना ।
 त्वया॑ जु॒ष्टा नु॒दमा॑ना दु॒रुक्ता॑न् बृ॒हद्व॑दे॒म वि॒दथे॑ सु॒वीराः॑ ।
 त्वया॑ जु॒ष्ट ऋ॒षिर् भ॑वति दे॒वि त्वया॑ ब्र॒ह्माऽऽ॒गत॑श्री रु॒त त्वया॑ ।
 त्वया॑ जु॒ष्टश्चि॑त्रं वि॒न्दते॑ व॒सु सा नो॑ जु॒षस्व॑ द्र॒विणो॑ नमे॒धे । 59 (4)

अनुवाकं - 42

T.A.6.42.1

मे॒धां म॒ इन्द्रो॑ ददातु मे॒धां दे॒वी सर॑स्वती ।
 मे॒धां मे॑ अ॒श्विना॑-वु॒भावा॑ध॒त्तां पु॑ष्कर॒स्रजा॑ ।

अ॒प्स॒रा॒सु च॒ या मे॒धा ग॒न्ध॒र्वेषु॑ च॒ यन्म॑नः ।

दै॒वीं॑ मे॒धा सर॑स्वती सा मां मे॒धा सु॒रभि॑र् जुषता॒ स्वाहा॑ । 60 (4)

अनुवाकं – 43

T.A.6.43.1

आमां॑ मे॒धा सु॒रभि॑र् वि॒श्वरू॑पा हि॒र॒ण्यव॑र्णा जगती॑ जग॒म्या ।

ऊ॒र्ज॒स्वती॑ पय॒सा पि॒न्वमा॑ना सा मां मे॒धा सु॒प्रती॑का जुषन्तां । 61 (2)

अनुवाकं – 44

T.A.6.44.1

मयि॑ मे॒धां मयि॑ प्र॒जां मय्य॑ग्निस्तेजो॑ दधातु॒ मयि॑ मे॒धां मयि॑ प्र॒जां

मयीन्द्र॑ इन्द्रि॒यं दधातु॑ मयि॑ मे॒धां मयि॑ प्र॒जां मयि॑ सूर्यो॑ भ्राजो

दधातु । 62 (1)

अनुवाकं – 45

T.A.6.45.1

अपै॑तु मृ॒त्यु-र॒मृत॑न्न आ॒गन् वैव॑स्वतो नो अ॒भय॑ङ्क॒णोतु॑ ।

पर्णं॑ व॒नस्प॑ते रि॒वाभि॑नः शी॒यता॑ र॒यिः स॑च॒तान्नः॑ श॒चीप॑तिः । 63 (2)

अनुवाकं - 46

T.A.6.46.1

परं॑ मृ॒त्यो अनु॑ परे॑हि पन्थां॑ य॒स्तेस्व॑ इ॒तरो॑ दे॒वयाना॑त् । चक्षु॑ष्मते
शृ॒ण्वते॑ ते ब्रवी॑मि मानः॑ प्र॒जाꣳ री॒रिषो॑ मोत॑ वी॒रान् । 64 (2)

अनुवाकं - 47

T.A.6.47.1

वातं॑ प्रा॒णं मन॑सा न्वा॒रभाम॑हे प्र॒जाप॑तिं यो भु॒वनस्य॑ गो॒पाः ।
सनो॑ मृ॒त्यो स्त्रा॑यतां पा॒त्वꣳह॑सो ज्यो॒ग् जी॒वा
ज॒राम॑शीमहि । 65 (2)

अनुवाकं - 48

T.A.6.48.1

अमु॒त्र भू॒याद॑ध य॒ध्यम॑स्य बृ॒हस्प॑ते अ॒भि॒शस्ते॑र मु॒ञ्चः ।
प्र॒त्यौ॒हता॑ म॒श्विना॑ मृ॒त्यु म॑स्माद् दे॒वाना॑मग्ने भि॒षजा॑ श॒चीभिः॑ । 66 (2)

अनुवाकं - 49

T.A.6.49.1

हरि॑ꣳ हर॒न्त- म॑नु॒यन्ति॑ दे॒वा वि॒श्वस्ये॑शानं वृ॒षभं॑ म॒तीनां॑ ।
ब्र॒ह्म स॒रूप॑-म॒नुमे॑दमा॒गा-द॒यनं॑ मा वि॒वधी॑र् वि॒क्रम॑स्व । 67 (2)

अनुवाकं – 50

T.A.6.50.1

शल॒कै॒र॒ग्नि॑ मि॒न्धा॒न उ॒भौ लो॒कौ स॒नेम॒हं ।

उ॒भयो॑ लो॒कया॑र् ऋ॒ध्वाऽति॑ मृ॒त्युं त॒राम्य॑हं । 68 (2)

अनुवाकं – 51

T.A.6.51.1

मा च्छि॒दो मृ॒त्यो मा व॑धी॒र्मा मे ब॒लं वि॒वृ॒हो मा प्र॑मो॒षीः ।

प्र॒जां मा मे॑ री॒रिष॑ आ॒युरु॒ग्र नृ॒चक्ष॑सं त्वा ह॒विषा॑ वि॒धेम । 69 (2)

अनुवाकं – 52

T.A.6.52.1

मा नो॑ म॒हान्त॑मु॒त मा नो॑ अ॒र्भकं॑ मा न उ॒क्षन्त॑मु॒त मा न उ॒क्षितं॑ ।

मा नो॑ व॒धीः पि॒तरं॑ मो॒त मा॒तरं॑ प्रि॒या मा न॑स्त॒नुवो॑

रु॒द्र री॒रिषः॑ । 70 (2)

अनुवाकं – 53

T.A.6.53.1

मा न॑स्तो॒के त॒नये॑ मा न आ॒युषि॑ मा नो गो॒षु मा नो अ॒श्वेषु॑ री॒रिषः॑ ।

वी॒रा॒न्मा नो॑ रु॒द्र भा॒मितो॑व॒धीर्-ह॒विष्म॑न्तो न॒मसा॑ वि॒धेम ते । 71 (2)

अनुवाकं - 54

T.A.6.54.1

प्र॒जा॒प॒ते॒ न॒ त्व॒दे॒ता-न्य॒न्यो॒ वि॒श्वा॒ जा॒ता॒नि॒ परि॒ता॒ ब॒भू॒व ।

यत् का॒मा॒स्ते॒ जु॒हु॒म॒स्त॒न्नो॒ अ॒स्तु॒ व॒य॒ꣳ स्या॒म॒ प॒त॒यो॒ र॒यी॒णां॒ । 72 (2)

अनुवाकं - 55

T.A.6.55.1

स्व॒स्ति॒दा॒ वि॒श॒स्प॒ति॒र् वृ॒त्र॒हा॒ वि॒मृ॒धो॒ व॒शी॒ ।

वृ॒षे॒न्द्रः॑ पु॒र ए॒तु॒ न॒स्स्व॒स्ति॒दा॒ अ॒भयं॑ क॒रः॑ । 73 (2)

अनुवाकं - 56

T.A.6.56.1

त्र्यं॒बकं॑ य॒जाम॑हे सु॒गन्धिं॑ पु॒ष्टि॒व॒र्ध॒नं॑ ।

उ॒र्वारु॑कमि॒व ब॒न्ध॒नान्-मृ॒त्योर् मु॒क्षी॒य माऽमृ॑तात् ॥ 74 (2)

अनुवाकं - 57

T.A.6.57.1

ये ते॒ स॒ह॒स्र॑म॒यु॒तं पा॒शा मृ॒त्यो म॒र्त्या॒य ह॑न्त॒वे ।

ता॒न् य॒ज्ञ॒स्य॑ मा॒यया॑ सर्वा॒न॒व य॑जामहे । 75 (2)

अनुवाकं – 58

T.A.6.58.1

मृ॒त्य॒वे॒ स्वा॒हा॒ मृ॒त्य॒वे॒ स्वा॒हा॒ ॥ 76 (1)

अनुवाकं – 59

T.A.6.59.1

दे॒व॒कृ॒त॒स्यै॒न॒सो॒-ऽव॒य॒ज॒न॒म॒सि॒ स्वा॒हा॒ ॥

म॒नु॒ष्य॒कृ॒त॒स्यै॒न॒सो॒ ऽव॒य॒ज॒न॒म॒सि॒ स्वा॒हा॒ ॥

पि॒तृ॒कृ॒त॒स्यै॒न॒सो॒ ऽव॒य॒ज॒न॒म॒सि॒ स्वा॒हा॒ ॥

आ॒त्म॒कृ॒त॒स्यै॒न॒सो॒ ऽव॒य॒ज॒न॒म॒सि॒ स्वा॒हा॒ ॥

अ॒न्य॒कृ॒त॒स्यै॒न॒सो॒ ऽव॒य॒ज॒न॒म॒सि॒ स्वा॒हा॒ ॥

अ॒स्म॒त्कृ॒त॒स्यै॒न॒सो॒ ऽव॒य॒ज॒न॒म॒सि॒ स्वा॒हा॒ ॥

य॒द्वि॒वा च॒ न॒क्तं॒ चै॒नश्च॒कृ॒म॒ त॒स्या॒ व॒य॒ज॒न॒म॒सि॒ स्वा॒हा॒ ॥

य॒थ् स्व॒प॒न्तश्च॒ जा॒ग्र॒त-श्चै॒नश्च॒-कृ॒म॒ त॒स्या॒ व॒य॒ज॒न॒म॒सि॒ स्वा॒हा॒ ॥

य॒थ् सु॒षु॒प्तश्च॒ जा॒ग्र॒त-श्चै॒नश्च॒-कृ॒म॒ त॒स्या॒ व॒य॒ज॒न॒म॒सि॒ स्वा॒हा॒ ॥

य॒द् वि॒द्वाꣳ स॒श्चा वि॒द्वाꣳ स॒श्चै॒नश्च॒-कृ॒म॒ त॒स्या॒ व॒य॒ज॒न॒म॒सि॒ स्वा॒हा॒ ॥

ए॒न॒स ए॒न॒सो॒ व॒य॒ज॒न॒म॒सि॒ स्वा॒हा॒ ॥ 77 (11)

अनुवाकं - 60

T.A.6.60.1

य॒द्वो दे॒वाश्च॑कृ॒म जि॒ह्वया॑ गु॒रुम॑न॒सो वा प्र॑यु॒ती दे॒व हे॒डनं॑ ।

अ॒रा॒वा॒यो नो॑ अ॒भि॒दु॒च्छु॒नाय॑ते तस्मिन् तदे॒नो व॑स॒वो

नि॒धे॒तन॑ स्वाहा ॥ 78 (2)

अनुवाकं - 61

T.A.6.61.1

का॒मोऽका॑र्षीन् न॒मो न॑मः । का॒मोऽका॑र्षीत् का॒मः क॑रोति ना॒हं क॑रोमि

का॒मः क॑र्त्ता ना॒हं क॑र्त्ता का॒मः का॑रयिता ना॒हं का॑रयिता एष ते

का॒म का॑माय स्वाहा ॥ 79 (2)

अनुवाकं - 62

T.A.6.62.1

म॒न्युर॑का॒र्षीन् न॒मो न॑मः । म॒न्युर॑का॒र्षीन् म॒न्युः क॑रोति ना॒हं क॑रोमि

म॒न्युः क॑र्त्ता ना॒हं क॑र्त्ता म॒न्युः का॑रयिता ना॒हं का॑रयिता एष ते

म॒न्यो म॑न्यवे स्वाहा ॥ 80 (2)

अनुवाकं - 63

T.A.6.63.1

ति॒लाञ्जु॑होमि सर॒साꣳ स॑पि॒ष्टान् ग॑न्ध॒ार म॑म चि॒त्ते र॑मन्तु स्वाहा ।

गावो हिरण्यं धनमन्नपानं सर्वेषां श्रियै स्वाहा ।

श्रियञ्च लक्ष्मिञ्च पुष्टिञ्च कीर्तिं चा नृण्यतां ।

ब्रह्मण्यं बहु-पुत्रतां । श्रद्धामेधे प्रजाः सन्ददातु स्वाहा । 81 (5)

अनुवाकं – 64

T.A.6.64.1

तिलाः कृष्णा-स्तिलाः श्वेता-स्तिलाः सौम्या वशानुगाः ।

तिलाः पुनन्तु मे पापं यत्किञ्चिद् दुरितं मयि स्वाहा ।

चोरस्यान्नं नवश्राद्धं ब्रह्महा गुरुतल्पगः ।

गोस्तेयं सुरापानं भ्रूणहत्या तिला शान्तिं शमयन्तु स्वाहा ।

श्रीश्च लक्ष्मीश्च पुष्टीश्च कीर्तिं चा नृण्यतां ।

ब्रह्मण्यं बहु पुत्रतां । श्रद्धामेधे प्रजातु जातवेदः

सन्ददातु स्वाहा । 82 (7)

अनुवाकं – 65

T.A.6.65.1

प्राणापान-व्यानोदान-समाना मे शुध्यन्तां

ज्योति॑ र॒हं वि॑रजा वि॒पाप्मा भू॑यास॒ स्वाहा॑ ॥

वाङ्-मन-श्चक्षुः-श्रोत्र-जिह्वा-घ्राण-रेतो-बुद्ध्याकूतिः सङ्कल्पा मे
शु॒ध्यन्तां ज्योति॑ र॒हं वि॑रजा वि॒पाप्मा भू॑यास॒ स्वाहा॑ ॥

त्वक्-चर्म-मांस-रुधिर-मेदो-मज्जा-स्नायवो-ऽस्थीनि मे
शु॒ध्यन्तां ज्योति॑ र॒हं वि॑रजा वि॒पाप्मा भू॑यास॒ स्वाहा॑ ॥

शिरः पाणि पाद पार्श्व पृष्ठो-रूदर-जङ्घ-शिश्नोपस्थ पायवो मे
शु॒ध्यन्तां ज्योति॑ र॒हं वि॑रजा वि॒पाप्मा भू॑यास॒ स्वाहा॑ ॥

उत्तिष्ठ पुरुष हरित-पिङ्गल लोहिताक्षि देहि देहि ददापयिता मे
शु॒ध्यन्तां ज्योति॑ र॒हं वि॑रजा वि॒पाप्मा भू॑यास॒ स्वाहा॑ ॥ 83 (5)

अनुवाकं - 66

T.A.6.66.1

पृथिव्याप स्तेजो वायु-राकाशा मे शु॒ध्यन्तां
ज्योति॑ र॒हं वि॑रजा वि॒पाप्मा भू॑यास॒ स्वाहा॑ ॥

शब्द-स्पर्श-रूपरस-गन्धा मे शु॒ध्यन्तां

ज्योति॑ र॒हं वि॑रजा वि॒पाप्मा भू॒यास॑ ७ स्वाहा॑ ।

मनो॑-वाक्-काय॑-कर्माणि॑ मे शु॒ध्यन्तां॑

ज्योति॑ र॒हं वि॑रजा वि॒पाप्मा भू॒यास॑ ७ स्वाहा॑ ।

अव्यक्त॑भावै-रहङ्कारैर् ज्योति॑ र॒हं वि॑रजा वि॒पाप्मा भू॒यास॑ ७ स्वाहा॑ ।

आत्मा॑ मे शु॒ध्यन्तां॑ ज्योति॑ र॒हं वि॑रजा वि॒पाप्मा भू॒यास॑ ७ स्वाहा॑ ।

अन्तरात्मा॑ मे शु॒ध्यन्तां॑ ज्योति॑ र॒हं वि॑रजा वि॒पाप्मा भू॒यास॑ ७ स्वाहा॑ ।

परमात्मा॑ मे शु॒ध्यन्तां॑ ज्योति॑ र॒हं वि॑रजा वि॒पाप्मा
भू॒यास॑ ७ स्वाहा॑ । क्षु॒धे स्वाहा॑ । क्षु॒त्पिपा॑साय स्वाहा॑ ।

वि॒वि॒द्यै स्वाहा॑ । ऋ॒ग्वि॒धाना॑य स्वाहा॑ । क॒षो॒त्काय॑ स्वाहा॑ ।

क्षु॒त्पिपा॑साम॒लं ज्ये॑ष्ठाम॒लक्ष्मी॑र् नाशयाम्य॒हं ।

अ॒भू॒ति-म॑समृ॒द्धिञ्च॑ सर्वा॑ निर्णु॒द मे पा॑प्मान॑ ७ स्वाहा॑ ।

अ॒न्नम॑य-प्रा॒णम॑य-म॒नोम॑य-वि॒ज्ञान॑मय-मा॒नन्द॑मय-मा॒त्मा मे॑

शु॒ध्यन्तां॑ ज्योति॑ र॒हं वि॑रजा वि॒पाप्मा भू॒यास॑ ७ स्वाहा॑ । 84 (15)

अनुवाकं - 67

T.A.6.67.1

अ॒ग्नये॑ स्वाहा॑ । वि॒श्वेभ्यो॑ दे॒वेभ्यः॑ स्वाहा॑ । ध्रु॒वाय॑ भू॒माय॑ स्वाहा॑ ।
ध्रु॒वक्षि॑तये स्वाहा॑ । अ॒च्युत॑क्षितये स्वाहा॑ । अ॒ग्नये॑ स्वि॒ष्टकृ॑ते स्वाहा॑ ।
ध॒र्माय॑ स्वाहा॑ । अ॒ध॒र्माय॑ स्वाहा॑ । अ॒द्भ्यः॑ स्वाहा॑ ।

ओ॒षधि॑व॒नस्प॑तिभ्यः स्वाहा॑ । 85 (10)

T.A.6.67.2

र॒क्षोदे॑व॒जने॑भ्यः स्वाहा॑ ।

गृ॒ह्याभ्यः॑ स्वाहा॑ । अ॒वसाने॑भ्यः स्वाहा॑ । अ॒वसान॑पतिभ्यः स्वाहा॑ ।

सर्व॑ भू॒तेभ्यः॑ स्वाहा॑ । का॒माय॑ स्वाहा॑ । अ॒न्तरि॑क्षाय स्वाहा॑ ।

यदे॒जति॑ जगति॑ यच्च॑ चेष्टति॑ नाम्नो॑ भा॒गोऽयं॑ नाम्ने॑ स्वाहा॑ ।

पृ॒थिव्यै॑ स्वाहा॑ । अ॒न्तरि॑क्षाय स्वाहा॑ । 86 (10)

T.A.6.67.3

दि॒वे स्वाहा॑ । सू॒र्याय॑ स्वाहा॑ । च॒न्द्रम॑से स्वाहा॑ । नक्ष॑त्रेभ्यः स्वाहा॑ ।

इन्द्रा॑य स्वाहा॑ । बृ॒हस्प॑तये स्वाहा॑ । प्र॒जाप॑तये स्वाहा॑ ।

ब्र॒ह्मणे॑ स्वाहा॑ । स्व॒धा पि॒तृभ्यः॑ स्वाहा॑ ।

नमो रुद्राय पशुपतये स्वाहा । 87 (10)

T.A.6.67.4

देवेभ्यः स्वाहा । पितृभ्यः स्वधाऽस्तु । भूतेभ्यो नमः ।

मनुष्येभ्यो हन्ता । प्रजापतये स्वाहा । परमेष्ठिने स्वाहा ।

यथा कूपः शतधारः सहस्रधारो अक्षितः ।

एवा मे अस्तु धान्यं सहस्रधार-मक्षितं । धनधान्यै स्वाहा ।

ये भूताः प्रचरन्ति दिवानक्तं बलि-मिच्छन्तो वितुदस्य प्रेष्याः () ।

तेभ्यो बलिं पुष्टिं कामो हरामि मयि पुष्टिं पुष्टिपतिर् दधातु

स्वाहा । 88 (11) (ओषधिवनस्पतिभ्यः स्वाहा – उत्तरिक्षाय स्वाहा

– नमो रुद्राय पशुपतये स्वाहा – वितुदस्य प्रेष्या एकं च) (A67)

अनुवाकं – 68

T.A.6.68.1

ओं तद् ब्रह्म । ओं तद् वायुः । ओं तदात्मा । ओं तथ् सत्यं ।

ओं तथ् सर्वं । ओं तत् पुरोर् नमः । अन्तश्चरति भूतेषु गुहायां विश्व

मूर्तिषु । त्वं यज्ञस्त्वं वषट्कारस्त्व-मिद्रस्त्वञ् रुद्रस्त्वं- विष्णुस्त्वं
ब्रह्मत्वं प्रजापतिः । त्वं तदाप आपो ज्योती रसोऽमृतं ब्रह्म

भूर्भुवस्सुवरो । 89 (9)

अनुवाकं - 69

T.A.6.69.1

श्रद्धायां प्राणे निविष्टोऽमृतं जुहोमि । श्रद्धायामपाने निविष्टोऽमृतं
जुहोमि । श्रद्धायां व्याने निविष्टोऽमृतं जुहोमि । श्रद्धायामुदाने
निविष्टोऽमृतं जुहोमि । श्रद्धायाञ् समाने निविष्टोऽमृतं जुहोमि ।
ब्रह्मणि म आत्माऽमृतत्वाय । अमृतोपस्तरणमसि ।

श्रद्धायां प्राणे निविष्टोऽमृतं जुहोमि । शिवो मा विशाप्रदाहाय ।
प्राणाय स्वाहा । श्रद्धायामपाने निविष्टोऽमृतं जुहोमि ।
शिवो मा विशाप्रदाहाय । अपानाय स्वाहा ।

श्रद्धायां व्याने निविष्टोऽमृतं जुहोमि । शिवो मा विशाप्रदाहाय ।
व्यानाय स्वाहा । श्रद्धाया-मुदाने निविष्टोऽमृतं जुहोमि ।
शिवो मा विशाप्रदाहाय । उदानाय स्वाहा ।

श्रद्धाया॑ स्माने॑ निवि॑ष्टोऽमृतं॑ जुहोमि । शिवो॑ मा वि॒शाप्र॑दाहाय ।
स॒मानाय॑ स्वाहा । ब्र॒ह्मणि॑ म आ॒त्माऽमृत॑त्वाय ।

अमृ॑तापि॒धानम॑सि । 90 (24)

अनुवाकं – 70

T.A.6.70.1

श्रद्धायां॑ प्रा॒णे निवि॑श्याऽमृतं॑ हु॒तं । प्रा॒ण मन्ने॑नाप्यायस्व ।
श्रद्धाया॑मपा॒ने निवि॑श्याऽमृतं॑ हु॒तं । अपा॒न मन्ने॑नाप्यायस्व ।
श्रद्धायां॑ व्य॒ाने निवि॑श्याऽमृतं॑ हु॒तं । व्य॒ान मन्ने॑नाप्यायस्व ।
श्रद्धाया॑ मु॒दाने॑ निवि॑श्याऽमृतं॑ हु॒तं । उ॒दान मन्ने॑नाप्यायस्व ।
श्रद्धाया॑ स्माने॑ निवि॑श्याऽमृतं॑ हु॒तं ।

स॒मान मन्ने॑नाप्यायस्व । 91 (10)

अनुवाकं – 71

T.A.6.71.1

अङ्गु॑ष्ठमा॒त्रः पु॒रुषोऽङ्गु॑ष्ठञ्च॑ स॒माश्रि॑तः ।

ई॒शः सर्व॑स्य जग॑तः प्र॒भुः प्री॑णाति॒ विश्व॑भुक् । 92 (2)

अनुवाकं - 72

T.A.6.72.1

वाङ्म॑ आ॒सन् । न॒सोः प्रा॒णः । अ॒क्ष्यो-श्चक्षुः॑ । क॒र्णयोः श्रोत्रं॑ ॥
बा॒हुवोर् ब॒लं ॥ ऊ॒रुवो रोजः॑ । अ॒रि॒ष्टा वि॒श्वा॒न्य॒ङ्गानि॑ त॒नूः ।
त॒नुवा॑ मे॒ सह॑ नम॒स्ते अस्तु॑ मा मा॒ हि॒ंसीः । 93 (8)

अनुवाकं - 73

T.A.6.73.1

वयः॑ सु॒पर्णा॑ उप॒सेदु॑रिन्द्रं॑ प्रि॒य मे॒धा ऋ॒षयो॑ ना॒धमा॑नाः ।
अ॒प॒ध्वान्त॑ मूर्णु॒हि पू॒र्धि चक्षु॑र्-मु॒मु॒ग्ध्यस्मान्
नि॒धये॑ ऽव॒ब॒द्धान् । 94 (2)

अनुवाकं - 74

T.A.6.74.1

प्रा॒णानां॑ ग्र॒न्थिर॑सि रु॒द्रो मा॑ वि॒शान्त॑कः ।
ते॒नान्नेना॑-प्यायस्व । 95 (2)

अनुवाकं - 75

T.A.6.75.1

नमो॑ रु॒द्राय॑ वि॒ष्णवे॑ मृ॒त्युर्मे॑ पा॒हि । 96 (1)

अनुवाकं – 76

T.A.6.76.1

त्वम॑ग्ने॒ द्यु॒भि-स्त्वमा॑शु-शु॒क्षणि॑-स्त्वम॒द्भ्य-स्त्वम॑श्मन॒स्परि॑ ।
त्वं व॑नै॒भ्य-स्त्वमो॑षधी॒भ्य-स्त्वं नृ॑णां नृप॒ते जा॑यसे शुचिः । 97 (2)

अनुवाकं – 77

T.A.6.77.1

शिवे॑न मे सन्ति॑ष्ठस्व स्यो॒नेन॑ मे सन्ति॑ष्ठस्व सु॒भूतेन॑ मे सन्ति॑ष्ठस्व
ब्र॒ह्मव॑र्चसे॒न मे सन्ति॑ष्ठस्व य॒ज्ञस्य॑र्धि॒ मनु॑ सन्ति॑ष्ठ स्वो॒प ते
य॒ज्ञ नम॑ उप॒ ते नम॑ उप॒ ते नमः॑ । 98 (1)

अनुवाकं – 78

T.A.6.78.1

स॒त्यं परं॑ पर॒ऽ स॒त्यऽ स॒त्येन॑ न सु॒वर्गा-ल्लो॒काच्च॑वन्ते
क॒दाच॑न स॒ताऽ हि स॒त्यं तस्मा॑त् स॒त्ये र॑मन्ते, (1)

तप॑ इति॒ तपो॑ नान॒शना॑त् परं॑ य॒द्धि परं॑ तप॒स्तद् दु॒धर्षं॑
तद् दु॒राध॑र्षं तस्मा॑त् तप॒सि र॑मन्ते, (2)

दम॑ इति॒ निय॑तं ब्र॒ह्मचा॑रिण-स्तस्मा॑द् दमे॑ रमन्ते, (3)

श॒म इ॒त्य॒रण्ये॑ मु॒नय॑-स्तस्मा॒च्छमे॑ रमन्ते, (4)

दान॑मि॒ति सर्वा॑णि भू॒तानि॑ प्र॒श॒स॒न्ति॑ दा॒नान्ना॑ति दु॒श्च॒रं
तस्मा॑द् दा॒ने रम॑न्ते, (5)

ध॒र्म इ॒ति ध॒र्मे॑ण॒ सर्व॑मि॒दं परि॑गृही॒तं ध॒र्मान्ना॑ति-दु॒ष्क॒रं
तस्मा॑द् -ध॒र्मे रम॑न्ते, (6)

प्र॒जन इ॒ति भू॒या॒स-स्तस्मा॑द् भू॒यि॒ष्ठाः प्र॒जाय॑न्ते तस्मा॑द् भू॒यि॒ष्ठाः
प्र॒जन॑ने रमन्ते, (7)

ऽग्न॑य इ॒त्याह॑ तस्मा॑-द॒ग्नय॑ आ॒धात॑व्या अ॒ग्नि॒हो॒त्र-मि॒त्याह॑
तस्मा॑-द॒ग्नि॒हो॒त्रे रम॑न्ते, (8)

य॒ज्ञ इ॒ति य॒ज्ञो हि॑ दे॒वा स्तस्मा॑द् य॒ज्ञे रम॑न्ते, (9)

मा॒न स॑मि॒ति वि॒द्वा॒स-स्तस्मा॑द् वि॒द्वा॒स ए॒व मा॑न॒से
रम॑न्ते, (10)

न्या॒स इति॑ ब्र॒ह्मा ब्र॒ह्मा हि॑ परः॒ परो॑ हि॒ ब्र॒ह्मा तानि॑ वा ए॒तान्य॑ वराणि॒
परा॑ँ॒सि न्या॒स ए॒वात्य॑रेच॒ यद्य॑ ए॒वं वेदै॑त्युपनिषत् । (11) 99 (1)

अनुवाकं – 79

T.A.6.79.1

प्रा॒जाप॑त्यो हा॒रुणिः॑ सु॒पर्णे॑यः प्र॒जाप॑तिं पि॒तर-मु॑प॒ससार॑ किं
भग॑वन्तः पर॒मं वे॑दन्तीति॒ तस्मै॑ प्रो॒वाच॑, (1)

सत्ये॑न वा॒युरा॑वाति॒ सत्ये॑-ना॒दित्यो॑ रोचते दि॒वि स॒त्यं वा॑चः प्र॒तिष्ठा
सत्ये॑ सर्वं प्र॒तिष्ठि॑तं तस्मा॑त् स॒त्यं पर॒मं वे॑दन्ति, (2)

तप॑सा दे॒वा दे॒वता-म॑ग्र आयन् तप॑सर्ष॒यः सु॒वर॑न्व-वि॒न्दन् तप॑सा
सप॑न्नान् प्र॒णुदा॑-मा॒राती॑ स्तप॑सि सर्वं प्र॒तिष्ठि॑तं तस्मा॑त् तपः॒ पर॒मं
वे॑दन्ति, (3)

दमे॑न दान्ताः कि॒ल्बिष॑-मव॒धून्व॑न्ति दमे॑न ब्र॒ह्मचा॑रिणः सु॒वर॑गच्छन् दमो॑
भू॒तानां॑ दु॒राध॑र्षं दमे॑ सर्वं प्र॒तिष्ठि॑तं तस्मा॑द् दमः॒ पर॒मं वे॑दन्ति, (4)

शमे॑न शा॒न्ताः शिव॑-माच॒रन्ति॑ शमे॑न नाकं॑ मु॒नयो॑-ऽन्ववि॒न्दन् छमो॑
भू॒तानां॑ दु॒राध॑र्षं छमे॑ सर्वं॑ प्रति॒ष्ठितं॑ तस्मा॑च्छमः॑

पर॑मं व॒दन्ति॑, (5)

दानं॑ य॒ज्ञानां॑ व॒रूथं॑ दक्षि॒णा लो॒के दा॒तार॑ सर्वं॑ भू॒तान्यु॑पजीवन्ति॑
दाने॑नारा॒ती-र॑पानुदन्त दाने॑न द्विषन्तो मि॒त्रा भव॑न्ति दाने॑ सर्वं॑ प्रति॒ष्ठितं॑
तस्मा॑द् दानं॑ पर॑मं व॒दन्ति॑, (6)

धर्मो॑ विश्व॑स्य जग॑तः प्रति॒ष्ठा लो॒के धर्मि॑ष्ठं प्रजा॑ उप॒सर्प॑न्ति धर्मे॑ण
पाप॑-मपनुदति धर्मे॑ सर्वं॑ प्रति॒ष्ठितं॑ तस्मा॑द् धर्मं॑ पर॑मं व॒दन्ति॑, (7)

प्र॒जन॑नं वै प्रति॒ष्ठा लो॒के सा॒धु प्र॒जाया॑ स्तन्तुं-तन्वा॑नः पि॒तृणा॑
म॒नृ॒णो भव॑ति तदे॒व तस्या॑ अ॒नृ॒णं तस्मा॑त् प्र॒जन॑नं

पर॑मं व॒दन्त्य॑, (8)

ग्नयो॑ वै त्रयी॑ विद्या॑ दे॒वयानः॑ पन्था॑ गा॒र्हप॑त्य ऋक्-पृ॒थिवी॑ रथ॒न्तर॑
-मन्वा॑हार् य॒पच॑नं य॒जुरन्तरि॑क्षं वाम॑दे॒व्य मा॒हव॑नीयः साम॑सुव॒र्गो

लो॒को बृ॒हत्-तस्मा॑-दग्नीन् पर॒मं व॑दन्त्य, (9)

ग्नि॑होत्रं सा॒यं प्रा॒तर्-गृ॒हाणां॑-निष्कृ॑तिः स्वि॑ष्टं सु॒हुतं य॑ज्ञक्र॒तूनां॑
प्रा॒यणं सु॒वर्ग॑स्य लो॒कस्य॑ ज्योति॑-स्तस्मा॑-

दग्नि॑होत्रं पर॒मं व॑दन्ति, (10)

य॒ज्ञ इति॑ य॒ज्ञेन॑ हि दे॒वा दि॒वं ग॒ता य॒ज्ञेना॑सुरा-नपा॑नुदन्त य॒ज्ञेन॑
द्विष॑न्तो मि॒त्रा भ॑वन्ति य॒ज्ञे स॒र्वं प्र॑तिष्ठि॒तं तस्मा॑द् य॒ज्ञं
पर॒मं व॑दन्ति, (11)

मा॒नसं॑ वै प्रा॒जाप॑त्यं पवि॒त्रं मा॒नसे॑न म॒नसा॑ साधु पश्य॑ति मा॒नसा॑
ऋष॑यः प्र॒जा अ॑सृजन्त मा॒नसे॑ स॒र्वं प्र॑तिष्ठि॒तं तस्मा॑न्
मा॒नसं॑ पर॒मं व॑दन्ति, (12)

न्या॒स इ॒त्याहु॑र् मनी॒षिणो॑ ब्र॒ह्माणं॑ ब्र॒ह्मा वि॑श्वः क॒तमः॑
स्वयं॑भुः प्र॒जाप॑तिः सँव॑त्सर इति, (13)

सँव॒थ्स॒रो ऽसा॒वादि॒त्यो य ए॒ष आ॒दि॒त्ये पु॒रुषः॑ स

पर॒मे॒ष्ठी ब्र॒ह्मा॒त्मा, (14)

याभि॑रादि॒त्य-स्त॑पति रश्मि॑भिस्ताभिः प॒र्जन्यो॑ वर्ष॑ति प॒र्जन्ये-
नौष॑धि-वनस्प॑तयः प्रजा॑यन्त ओष॑धि-वनस्प॑तिभि-रन्नं॑ भवत्य॑न्नेन
प्रा॒णाः प्रा॒णैर् ब॒लं ब॒लेन॑ तप-स्तप॑सा श्रद्धा॑ श्रद्ध॑या मे॒धा मे॒धया॑
मनी॑षा मनी॑षया मनो॑ मनसा॑ शान्तिः॑ शान्त्या॑ चि॒त्तं चि॒त्तेन॑ स्मृति॑
स्मृत्या॑ स्मार॑ स्मारेण॑ वि॒ज्ञानं॑ वि॒ज्ञाने॑-नात्मानं॑ वेद॑यति तस्मा॑दन्नं
दद॑न्त् सर्वा॑ण्येतानि ददा॑-त्यन्नात् प्रा॒णा भव॑न्ति भू॒तानां॑ प्रा॒णैर् मनो॑
मन॑सश्च वि॒ज्ञानं॑ वि॒ज्ञाना॑-दान॑न्दो ब्र॒ह्म योनिः॑, (15)

स वा ए॒ष पु॒रुषः॑ पञ्च॑धा पञ्चा॑त्मा येन॑ सर्व॑मिदं प्रोतं॑ पृथि॒वी
चान्तरि॑क्षं च द्यौश्च॑ दि॒शश्चावा॑न्तरदि॒शाश्च॑ स वै सर्व॑मिदं जग॑त्स
स॒भूत॑ स भव्यं॑ जि॒ज्ञास॑ क्लृ॒प्त ऋ॒तजा॑ रयि॒ष्ठा श्रद्धा॑ सत्यो॑
मह॑स्वान् तप॑सो परि॒ष्टाद्, (16)

ज्ञा॑त्वा तमे॒वं मन॑सा हृ॒दा च॑ भूयो॑ न मृ॒त्यु-मुप॑याहि वि॒द्वान् (17)

तस्मा॑-न्या॒स-मेषां॑ तप॒सा-मतिरि॑क्तमाहु॒र, (18)

वसु॑र॒ण्वो वि॒भूर॑सि प्रा॒णे त्वम॑सि सन्धा॒ता ब्र॑ह्मन् त्वम॑सि वि॒श्वधृ॑त्ते-
जोदा॑स् त्वम॑स्यग्नि-र॒सि वर्चो॑दा-स्त्वम॑सि सूर्य॑स्य द्यु॒म्नोदा॑
स्त्वम॑सि च॒न्द्रम॑स उप॒याम॑ गृहीतोऽसि ब्र॑ह्म॒णे त्वा मह॑स, (19)

ओमि॒त्यात्मानं॑ यु॒ञ्जीतै॒तद्वै महो॑पनिषदं दे॒वानां॑ गु॒ह्यं य॒ एवं वेद॑
ब्र॒ह्म॒णो महि॑मान-माप्नोति तस्मा॑द् ब्र॒ह्म॒णो
महि॑मान-मित्यु॒पनिष॑त् । (20) 100 (1)

अनुवाकं – 80

T.A.6.80.1

तस्यै॒वं वि॒दुषो॑ य॒ज्ञस्या॑त्मा यज॑मानः -श्र॒द्धाप॑त्नी शरी॒र-मि॒ध्ममु॑रो
वेदि॑र्-लोमा॒नि बर्हि॑र् -वेदः-शि॒खा हृद॑यं यू॒पः का॒म आ॒ज्यं म॑न्युः
प॒शु-स्त॑पोऽग्नि॒र्-दमः॑ शम॒यिता॑ दक्षि॒णा-वा॒ग्धोता॑ प्रा॒ण उ॒द्गता॑
चक्षु॑रध्व॒र्युर्-मनो॑ ब्र॒ह्मा श्रो॑त्रम॒ग्नी-ध्या॒वदि॑ध्र॒यते॑ सा दी॒क्षा

यद॑श्ना॒ति तद॑ध॒विर्-य॒त्पि॒बति॑ तद॒स्य सोम॑पानं॒ यँ॒द्र॒मते॑ तदु॒पस॑दो
यथ् संच॑र-त्यु॒पवि॑श-त्यु॒त्तिष्ठ॑ते च स॒प्र॒व॒र्ग्यो यन्मु॒खं तदा॑ह॒वनी॒यो
या व्या॑हति-राहु॒तिर्-यद॑स्य ,

वि॒ज्ञानं॑ तज्जु॒होति॑ यथ्सा॒यं प्रा॑तर॒त्ति तथ्स॑मि॒धं यँ॒त्प्रा॑तर् म॒ध्यन्दि॑नꣳ
सा॒यं च॒ तानि॑ स॒वनानि॑ ये अ॒होरा॑त्रे ते द॒र्श॒पूर्ण॑मा॒सौ
येऽर्द्ध॑मा॒साश्च॑ मा॒साश्च॑ ते चा॒तुर्मा॑स्यानि॒ य ऋ॒तव॑स्ते प॒शुब॑न्धा ये
सँव॑त्स॒राश्च॑ परि॒वत्स॑राश्च॒ तेऽह॑र्ग॒णाः सर्व॑ वे॒दसं॑ वा

ए॒तथ् स॒त्रं यँ॒न्म॒रणं॑ तद॒वभृ॑थ ए॒तद्वै ज॑राम॒र्य-म॑ग्नि॒होत्रꣳ
स॒त्रं यँ॒ एवं॑ वि॒द्वा-नु॑द॒गय॑ने प्र॒मीय॑ते दे॒वाना॑मे॒व म॑हि॒मानं॑
ग॒त्वाऽऽदि॑त्यस्य सा॒युज्यं॑

ग॒च्छ॒त्यथ॑ यो द॒क्षिणे॑ प्र॒मीय॑ते पि॒तृणा॑-मे॒व म॑हि॒मानं॑ ग॒त्वा च॑न्द्र॒मसः॑
सा॒युज्यꣳ स॒लो॒कता॑-मा॒प्नो॑त्ये॒तौ वै सू॒र्या च॑न्द्र॒मसौ॑र्-म॒हि॒मानौ॑

ब्रा॒ह्म॒णो वि॒द्वा-न॒भिज॑यति तस्माद् ब्रा॒ह्म॒णो म॒हि॒मा॒नमा॒प्नोति॑ तस्माद्
ब्रा॒ह्म॒णो म॒हि॒मा॒न-मि॒त्यु॒पनि॑षत् । 101 (1)

स॒ह ना॑ ववतु । स॒ह नौ॑ भुनक्तु । स॒ह वी॒र्यं॑ करवावहै ।
तेज॑स्विना वधी॑तमस्तु मा वि॒द्विषा॑वहै ।

ओं शान्तिः॑ शान्तिः॑ शान्तिः॑ ।

इति महानारायणोपनिषत् समाप्ता

Prapaataka Korvai with starting Padams of 1 to 80 Anuvaakams :-

(अ॒म्भ॒स्यै॒कप॑ञ्चाशच्छतं – जा॒तवे॑दसे चतु॒र्दश॑ – भू॒र॒न्नां –
भू॒र॒ग॒नये॑ – भू॒र॒ग॒नये॑ चै॒कमे॑कं – पा॒हि – पा॒हि च॒त्वारि॑ च॒त्वारि॑ –
यश्छ॑न्दसां द्वे – नमो॑ ब्रा॒ह्म॒णो – ऋ॒तं तपो॑ – यथा॑ वृ॒क्षस्यै॑क मे॒क
– म॒णो॒रणी॑या॒श्च॒तुस्त्रिं॑शत् – स॒हस्र॑शी॒षं ष॒ट्विं॑शति –
रा॒दि॒त्यो वा॑ ए॒ष – आ॒दि॒त्यो वै तेज॑ ए॒कमे॑कं – नि॒ध॒नप॑तये
त्रयो॑विं॒शतिः॑ – स॒द्यो जा॑तं त्रीणि – वा॒मदे॑वायै॒क – म॒घो॒रेभ्य॑ –
स्तत्पु॑रुषाय द्वे द्वे – ई॒शानो॑ – नमो॑ हि॒र॒ण्य॒बा॒हव॑ ए॒कमे॑क – मृ॒तं

स॒त्यं द्वे - स॒र्वो वै च॒त्वारि - क॒द्रु॒द्राय त्रीणि - यस्य वै क॒ङ्क॒ती
 - कृ॒णुष्व पा॒जो - ऽदि॒ति - रा॒पो वा इ॒दं॒ सर्व॒ मे॒कमे॒क - मा॒पः
 पु॒नन्तु च॒त्वा - र्य॒ग्निश्च - सूर्यश्च न॒व - न॒वोमि॒ति च॒त्वा -
 र्या॒यातु प॒चौ - जो॒ऽसि द॒शो - त॒मे च॒त्वारि - घृ॒णिस्त्रीणि -
 ब्र॒ह्ममे॒तु मां या॒स्ते॒ ब्र॒ह्मह॒त्यां द्वा॒दश - ब्र॒ह्म मे॒धया॒ऽद्या न इ॒मं
 भ्रू॒षह॒त्यां - ब्र॒ह्म मे॒धवा॒ ब्र॒ह्मा दे॒वाना॒मिदं वी॒रह॒त्यामे॒कान्न वि॒श॒ति
 रे॒कान्नवि॒श॒तिर् - मे॒धा दे॒वी - मे॒धां म इ॒न्द्रश्च॒त्वारि च॒त्वार्या -
 मां मे॒धा द्वे - म॒यि मे॒धा मे॒क - म॒पैतु - प॒रं - वा॒तं प्रा॒ण -
 म॒मु॒त्रभू॒याद् - ब॒द्धिर् - श॒ल्कैर॒ग्निं - मा छि॒दो मृ॒त्यो - मा नो
 म॒हान्तं - मा॒नस्तो॒के - प्र॒जाप॒ते - स्व॒स्ति॒दा - त्र्य॒म्बकं - ये ते
 स॒हस्रं द्वे द्वे - मृ॒त्यवे स्वा॒हैकं - दे॒वकृ॒तस्यै॒काद॒श - य॒द्वो दे॒वाः
 - का॒मोऽका॒र्षीन् - म॒न्युरका॒र्षीद् द्वे द्वे - ति॒लाज्जु॒होमि गा॒वः श्रि॒यं
 प्र॒जाः प॒ञ्च - ति॒लाः कृ॒ष्णाश्चो॒रस्य श्रीः प्र॒जातु जा॒तवे॒दः
 स॒प्त - प्रा॒ण वाक् त्वक् छि॒र उत्तिष्ठ पु॒रुष प॒ञ्च - पृ॒थि॒वी श॒ब्द
 म॒नो वाग् व्य॒क्ताऽऽत्माऽन्त॒रात्मा पर॒मात्मा मे॒ क्षु॒धेऽन्न॒मय
 प॒ञ्चद॒शा - ग॒नये स्वा॒हैकच॒त्वारि॒श - दा॒न्तद्ब्र॒ह्म न॒व -

षष्ठः प्रपाठकः – TA 6

॥
श्रद्धायां प्राणे निविष्ट श्रुतुर्विंशतिः – श्रद्धायां दशा – ड्गुष्ठ मात्रः
पुरुषो द्वे – वाङ्म आसन्नष्टौ – वयः सुपर्षाः – प्राणानां ग्रन्थिरसि
द्वे द्वे – नमो रुद्रायैकं – त्वमग्ने द्युभिर् द्वे – शिवेन मे सन्तिष्ठस्व
– सत्यं – प्राजापत्य – स्तस्यैव मेक मेक मशतिः)

Korvai with starting Padams of 1, 11, 21 Series of Dasinis :-

(अम्भस्यपारे – स्वस्ति नः – पाहि नो अग्न एकया – ऽऽदित्यो वा
एष – ऋतं सत्य – मो मित्या – मां मेधा – मा नस्तोके –
तिलाजुहोमि – श्रद्धायां प्राणे निविश्य – तस्यैव मेकोत्तरशतम्)

इति महानारायणोपनिषत् समाप्ता

Details of Dasini&Vaakyams for – Prapaatakam6 – TA 6

	Dasini	Vaakyams
Anuvakam 1	15	151
Anuvakam 2	1	14
Anuvakam 3	1	1
Anuvakam 4	1	1
Anuvakam 5	1	1
Anuvakam 6	1	4
Anuvakam 7	1	4

तैत्तिरीय आरण्यकं – महानारायणोपनिषत्– TA- 6

Anuvakam 8	1	2
Anuvakam 9	1	1
Anuvakam 10	1	1
Anuvakam 11	1	1
Anuvakam 12	3	34
Anuvakam 13	2	26
Anuvakam 14	1	1
Anuvakam 15	1	1
Anuvakam 16	2	23
Anuvakam 17	1	3
Anuvakam 18	1	1
Anuvakam 19	1	2
Anuvakam 20	1	2
Anuvakam 21	1	1
Anuvakam 22	1	1
Anuvakam 23	1	2
Anuvakam 24	1	4
Anuvakam 25	1	3
Anuvakam 26	1	1
Anuvakam 27	1	1
Anuvakam 28	1	1
Anuvakam 29	1	1
Anuvakam 30	1	4
Anuvakam 31	1	9

षष्ठः प्रपाठकः – TA 6

Anuvakam 32	1	9
Anuvakam 33	1	4
Anuvakam 34	1	5
Anuvakam 35	1	10
Anuvakam 36	1	4
Anuvakam 37	1	3
Anuvakam 38	1	12
Anuvakam 39	1	19
Anuvakam 40	1	19
Anuvakam 41	1	4
Anuvakam 42	1	4
Anuvakam 43	1	2
Anuvakam 44	1	1
Anuvakam 45	1	2
Anuvakam 46	1	2
Anuvakam 47	1	2
Anuvakam 48	1	2
Anuvakam 49	1	2
Anuvakam 50	1	2
Anuvakam 51	1	2
Anuvakam 52	1	2
Anuvakam 53	1	2
Anuvakam 54	1	2
Anuvakam 55	1	2

तैत्तिरीय आरण्यकं – महानारायणोपनिषत्– TA- 6

Anuvakam 56	1	2
Anuvakam 57	1	2
Anuvakam 58	1	1
Anuvakam 59	1	11
Anuvakam 60	1	2
Anuvakam 61	1	2
Anuvakam 62	1	2
Anuvakam 63	1	5
Anuvakam 64	1	7
Anuvakam 65	1	5
Anuvakam 66	1	15
Anuvakam 67	4	41
Anuvakam 68	1	9
Anuvakam 69	1	24
Anuvakam 70	1	10
Anuvakam 71	1	2
Anuvakam 72	1	8
Anuvakam 73	1	2
Anuvakam 74	1	2
Anuvakam 75	1	1
Anuvakam 76	1	2
Anuvakam 77	1	1
Anuvakam 78	1	1
Anuvakam 79	1	1

षष्ठः प्रपाठकः – TA 6

Anuvakam 80	1	1
Total →	101	579